

EL APOCALIPSIS

La revelación de Jesucristo

1 ¹Yái cuyàlutaca icàlidaca walí tàacáisi ìwali Dios imàaquéericaté Jesucristo yáalíacawa ìwali ibàacanéeri iyú áibanái ícha, yéewanápiná Jesucristo yáasáidacani Dios yàasu wenàiwicanái irí náalíacaténáwa càinácaalí iwàwacutáanápiná ichàbacawa caquialéta. Jesucristo ibànùacaté yàasu ángelwa yáasáidacaténá yái tàacáisica Juan irí, yái Juan, Jesucristo yàasu wenàiwicaca. ²Juan itànàacaté báisíiri iyúni cuyàluta irìcu macáita yái Dios itàacái Juan yéemièrica, yá nacái Jesucristo yàasu báisíiri tàacáisica, idécanáamité Juan iicáca macáita tàacáisi yéenáiwánási nacáiri irìcuíse.

³Casímáica iwàwa cawinácaalí iléerica nalíni, yái cuyàlutaca, culto irìcu, yái tàacáisi icàlidéerica walí càinácaalí ichàbáanápináwa. Casímáica nacái nawàwa cawinácaalí yeebéeyéica yái tàacáisica Juan itànèerica cháí cuyàluta irìcu, mesúnamáipinácáináta iwàwacutá ichàbacawa.

Juan escribe a las siete iglesias

⁴Núa Juan nutànàacuéca pirí cuyàluta, píacué yeebáidéeyéica Jesucristo itàacái, píacué iyéeyéica siete namanùbaca yàcalé Asia yàasu cáli íinata. Nusutácué Dios ícha pirípinácué, Espíritu Santo nacái, Jesucristo nacái, namàníinápinácué pirí cayábéeri, namàacáanápiná nacái matúíbanáicuéca pía. Dios ìyacaté bàaluité, siùca nacáide, iyéeripiná càiripináta, camíiri imáalàawa. Yái Espíritu Santoca máiníiri cayábaca ìyaca Dios yàasu yàalubáisi íipunita. ⁵Jesucristo itàaníca báisíiri iyú, imànica macáita machacàníiri iyú càide iyúwa íimáaná, icàlidacaté báisíiri tàacáisi éwitaté nanúacáanítani. Yái

Jesucristo, yácata idàbáanérica wenàiwica imichèricatéwa yéetáními yèewíse, idènièri iináwa càmfiri imáalàawa. Jesucristo ichùuliaca macái cáli icuèrinánái. Cáinináca Jesucristo iicáca wía. Jesucristo fíraná imusúacatéwa icháuná irícuíse cruz ìwali àta yéetacatalétawa wáichawalíná. Jesucristo yéetacáinátéwa wáichawalíná, íná Dios idéca imàacaca iwàwawa wabáyawaná ícha. ⁶Jesucristo idéca imàacaca yàasu wenàiwicaca wía. Imàacaca nacái wáibaidaca irípiná iyúwa sacerdotenái, wasutácaténá Dios ícha wenàiwicanái irípiná, yái Dios Jesucristo Yáanirica. Máiní nuwàwaca macái wenàiwica yàaca cayábéeri Jesucristo irí, nuwàwa nacái Jesucristo icùaca wenàiwicanái canánama càiripináta èri càmfiri imáalàawa. Báisíta, amén.

⁷ ¡Jesucristo yàapináwa néese acalèe yèewísewa! Macáita wenàiwica naiquéeripináni, nía nacái inuényécaténi, naiquéeripináwa. Macáita èri mìnanáì càmfíyéica yeebáida itàacái náicháanípiná nacalùniwa naicápinácaalí yàanàaca, cáalucáiná naicácani. Báisíta, amén.

⁸Wacuèriná Dios cachàiniíri náicha canánama, ìyacaté bàaluité, siuca nacáide, ìyapiná càiripináta, càmfiri imáalàawa. Wacuèriná Dios ímaca walí: “Núacata yái idàbéericaté macáita, núacata nacái yái imáalàidéeripináca macáita. Iná núacata càiride iyúwa las letras alfa y omega”, càì ímaca walí yái Wacuèriná Diosca.

Una visión del Cristo glorioso

⁹Núa Juan, péenásàiricué, nùuwichàacawa píapichacué Jesús irípiná weebáidacáiná itàacái. Weebáidaca itàacái, íná wacùapiná macáita Jesús yáapichawa. Abédanamata nacái wáiwitáise Jesús yáapicha wàidenìacaténá wàuwichàanáwa matuíbanáiri iyú. Yáté presocaté núa Patmos yàasu iwàwata ínata nucàlidacáináté Dios itàacái áibanái irí, nucàlidacáináté nacái Jesús iináwaná ìwali. ¹⁰Néeseté áiba domingomi, Espíritu Santo icùacaté nuíwitáise. Yá nuémìacaté tàacáisi nuínatawáisewa, yái cachàiniíri tàacáisi càiride iyúwa wéemianá trompeta isàna. ¹¹Yá ímaca nulí: “Pitànàa cuyàluta, picàlidacaténá nalíni càinácaalí piicáaná. Néese pibànua nalíni níara yeebáidéeyéica nutàacái ìyéeyéica siete namanùbaca yàcalé Asia yàasu cáli ínata. Níái yàcaléca náipidená: Efeso ìyacàlená, Esmirna ìyacàlená nacái, Pérgamo ìyacàlená nacái, Tiatira ìyacàlená nacái, Sardis ìyacàlená nacái, Filadelfia ìyacàlená nacái, Laodicea ìyacàlená nacái”, ímaca nulí.

¹²Yá nuwènúa nuicáidaca nuínataléwa nuicácaténá yái itàaníríca nulí. Yá nuicáca siete namanùbaca cáaléeyéi lámpara oroíyéi. ¹³Néese nuicá nèewibàa níái siete namanùbaca lámparaca càì iicácanáwade iyúwa asiali. Idèniaca ináawaniwa cáaléeri àta yàabàli ipùata néré. Idèniaca nacái cáucuíri iwaalíbapi oroíri yùucutalicubàawa. ¹⁴Cabalèeri íiwita ibáiná càide iyúwa waicáaná cabalèeri lana, nieve nacáiri áiba. Ituí nacái nàya càide iyúwa waicáaná quichái ipèrù. ¹⁵Yá mèlumèluíyéi yàabàli càide iyúwa waicáaná naquéesièrica bronce nacáirica nawasèrica ùuléeri iyú quéechacáwa manuúri quichái írìcu ipíchawáise naquéesiacani. Cachàinica itàacái càide iyúwa wéemianá manuúri inanába isàna yúuwèericawa íba yèewibàa. ¹⁶Idèniaca siete namanùbaca dùlupùta icáapi írìcuwa yéewápuwáiséeriwa. Itàacái iyaca càide iyúwa espada machete nacáiri báipunitácanaméeri caserúnica. Inàni nacái icànaca iyúwa èeri icànáná mèlumèluíri iyú cachàiniwaca machacànicaalí èeri.

¹⁷Nuicácanacáitani, yá núuwàa nulliacawa nunùmáawawa nucalùniwa yàabàli idaní càide iyúwa yéetéerimiwa. Quéwa imàacaca icáapiwa yéewápuwáiséewa nùwali. Yá íimaca nulí: “Picá cáalu pía nuícha. Núacata yái idàbéericaté macáita. Núacata nacái yái imáalàidéeripináca macáita. ¹⁸Núacata yái Cáurica. Nuétácatéwa quéwa, péemia cayába, siúcáisede nùyaca càiripináta. Núacata imàaquéerica wenàiwica yéetácawa néenáiwaná yàanàacatáita néetácatáipinátawa; nucùta nacái infierno, yáara báawéeyéimi íiwitáise yùuwichàacatalécawa íipidenácataléca infierno. ¹⁹Iná pitànàa macáita yái núsáidéeripináca píicá. Pitànàa nacái yái ichàbéericawa siúcade, yá nacái ichàbéeripináca áiba èeriwa wapíchalécáwa. ²⁰Siúcade nucàlida píríni càinácaalí íimáaná níái siete namanùbaca dùlupùta píiquéeyéica nucáapi írìcu. Nucàlida nacái píri càinácaalí íimáaná níái siete namanùbaca cáaléeyéica lámpara oroíyéica. Níái siete namanùbaca dùlupùta, íimáanáca càicanide iyúwa siete namanùbaca nacuèrinánái icuèyéica wenàiwicanái yeebáidéeyéica nutàacái siete namanùbaca yàcalé minaná. Níái siete namanùbaca lámpara cáaléeyéica, íimáanáca càicanide iyúwa siete namanùbaca náapichéeyéi iwacáidáyaquéeyéicawa yáapichawáaca yeebáidéeyéica nutàacái”, íimaca nulí yái Cáurica, yái Wáiwacali Jesucristoca.

Mensajes a las siete iglesias

El mensaje a Efeso

2 ¹Néese Wáiwacali íimaca nulí àniwa: “Pitànàa yái tàacáisica írí yáara nacuèrinásàiri icuèrica wenàiwicanái yeebáidéeyéica

nutàacái Efeso ìyacàlená ìricu: ‘Cài núumacuéca pírí, núa idènièrica siete namanùbaca dùlupùta núcáapi ìricuwa nuéwápuwáisewa, núa yèepuníiricawa nèewibàa náí siete namanùbaca cáaléeyéi lámpara oroíyéica: ²Núalíacawa macáitacué pìwali yái pimàníricuécá; núalíacawa píibaidacuéca nulípíná cachàiníri iyú; núalíacawa pìideníacuéca piùwichàanáwa nacái matuíbanáiri iyú; núalíacawa báawacuéca piicáca náiwitáise níara báawéeyéica wenàiwicaca. Núalíaca nacáiwa píalimáidacuéca piicáwa nàasu tàacáisi níara icàlidéeyéica iináwaná ìwaliwa apóstolcasa nía, quéwa nachìwa meedá. Pidécuéca píasáidaca cachìwéeyéica meedá nía. ³Núalíacawa pìideníacué piùwichàanáwa mamáalàacata. Núalíaca nacáiwa piùwichàacuécawa nulípíná manuísíwata nuípidená ìwali peebáidacáinácué nutàacái. Càmitacué nacái chamàle píiwitáise píibaidáanápínácué nulí. ⁴Quéwa nuicácué pìwali abéeri wawàsi báawéeri. Càmitacué cáininá piicáca áibanái càide iyúwaté cáinináaná piicáca nía quéechatécáwa. ⁵Iná píináidacuéwa ìwali yái quéechéeri píiwitáise cayábéerica piúquéericatécué píichawa. Pìwènúadacué píiwitáisewa machacàníri iyú, pimànicaténácué cayábéeri áibanái írí càide iyúwacué pimàníináté quéechatécáwa. Càmicaalícué càì pimànica, yásí nùacawa caquialéta píatalécué, yá nuedácué píicha píasu lámpara ìyacatái íichawa, càmicaalícué pìwènúada píiwitáisewa. ⁶Quéwa ìyacué pírí yái cayábéerica. Báawacuéca piicáca yái báawéerica nicolaítanái imànírica càide iyúwa nacái báawáaná nuicáca yái namànírica. ⁷Néese, càuwíiyéicaalícué pía, péemiácué cayába yái tàacáisica Espíritu Santo icàlidéerica wenàiwicanái írí yeebáidéeyéica nutàacái, ìyéeyéica yàcalé imanùbaca. Macáita cawinácaalí imawèníadéeyéica báawéeri, numàacapíná nayáaca nayáacaléwa àicu ìyacanáca yèerica nacáuca càmfíri imáalàawa, yái àicu ìyéerica paraíso néeni, Dios ìyacàle ìricu’, càì pitànàaca nalí cuyàluta”, íimaca yái Cáurica, yái Wáiwacali Jesucristoca.

El mensaje a Esmirna

⁸Néese Wáiwacali íimaca nulí àniwa: “Pitànàa yái tàacáisica írí yáara nacuèrinásàiri icuèrica wenàiwicanái yeebáidéeyéica nutàacái Esmirna ìyacàlená ìricu: ‘Cài núumacuéca pírí, núa idàbéericaté macáita, núa imáalàidéeripínáca macáita nacái, núa yéetéericatéwa, néeseté yèepùaca núcáuacàacawa: ⁹Núalíacawa piùwichàacuécawa pìyaca. Núalíacawa catúulécánácuéca pía, quéwacué nuicáca pía càiyéide iyúwa càasuíyéi. Núalía nacáiwa càinácaalí iyú nacháawàanácué

piináwaná ìwali báawéeri iyú, níara icàlidéeyéica iináwanáwa judfocasa nía, quéwa càmfíyèi judío nía nawàwalicuísewa, càmicáiná neebáida nutàacái. Báawéeri Satanás yéewáidacaléca meedá nía. ¹⁰Picácué cáalu piicáca yái piùwichàanápínacuécawa. Péemíacué cayába, mesúnamáita Satanás yúuca abénaméeyéi péenacué presoíyèi ibànaliculé yáalimáidacaténacué iicáwa pía macáita, piwènúadánápiná píiwitáisewa nuícha. Yá piùwichàapínacuéwa diez èeri. Quéwa cachànicué píiwitáise mamáalàacata, éwitacué nanúacaalí pía, yásí nùacué píríwa picáuca càmfíiri imáalàawa càide iyúwa nàacaalí corona wenàiwicanái irí imawèniadéeyéica áibanái. ¹¹Càuwíiyéicaalícué pía, péemíacué cayába yái tàacáisi Espíritu Santo icàlidéerica wenàiwicanái irí yeebáidéeyéica nutàacái, iyéeyéica yàcalé imanùbaca. Cawinácaalí imawèniadéeyéica báawéeri, canácatáita yéewanáwa pucháiba yàawiriéri yéetácáisi íibàaca níawa, canásíwa', càì pitànàaca nalí cuyàluta”, íimaca yái Cáurica, yái Wáiwacali Jesucristoca.

El mensaje a Pérgamo

¹²Néese Wáiwacali íimaca nulí àniwa: “Pitànàa yái tàacáisica irí yáara nacuèrinásàiri icuèrica wenàiwicanái yeebáidéeyéica nutàacái Pérgamo iyacàlená irìcu: ‘Cài nuchùuliacuéca pía, núa idènièrica espada machete nacáiri báipunitácanaméeri caserúnica: ¹³Núalíacawa macáita ìwali yái pimàníricuéca. Núalía nacáwa pìyacuéca aléera yàcalé Satanás icùacataléca. Núalíacawa peebáidacuéca nutàacái mamáalàacata tàì íiméeri iyú. Càmitacué piméeyáa peebáidaca nutàacái éwitaté nanúacáaníta Antipas, yái nanuéricaté yeebáidacáiná nutàacái pèewi, píacué iyéeyéica yàcalé Satanás icùacataléca. ¹⁴Quéwa nuicácué pìwali máisibáwanáita báawéeri wawàsi, yái càmfíirica cayába nuicáca: Pidèniacué píapichawa abénaméeyéi yéewáidéeyéica wenàiwica càide iyúwaté Balaam yéewáidáaná wenàiwica. Bàaluité Balaam yàalàacaté Balac yáalimáidáanápíná israelitanái namànicaténá nabáyawanáwa. Ichùuliacaté nayáanápíná iinási nanuèrimica iyúwa sacrificio nàacaténá ídolo icàaluíná, cuwáiná yéenáiwanáca. Ichùuliaté naimáca áibanái inanái yáapicha càmfíiyéica náinusíwa. ¹⁵Càita nacái, iyacué pèewibàa abénaméeyéi yeebáidéeyéica nicolaítanái yàasu cachìwéeri tàacáisi. ¹⁶Iná piwènúadacué píiwitáisewa báawéeri íicha. Càmicaalícué càì pimànica, yásí nùacuéwa pìatalé caquialéta. Yá numànipíná úwi náipunitawa nutàacái iyúwa, càide iyúwa wenàiwica namànicaalí úwi espada machete nacáiri iyú. ¹⁷Càuwíiyéicaalícué pía, péemíacué cayába

yái tàacáisi Espiritu Santo icàlidéerica wenàiwicanáí irí yeebáidéeyéica nutàacái, iyéeyéica yàcalé imanùbaca. Cawinácaalí imawènìadéerica báawéeri, nùaca iyáapíná maná, yái pan nacáirica ibàacanáta áibanáí wenàiwica íicha. Nùa nacái irí cabalèeri íba natànèerica ìwali wàlisàì íipidenápiná. Abéerita yái idènièrica yàasu íbawa, yáalía ìwali yái íipidenápináca wàlisàì, canáca áibanáí yáaliériwa ìwali', càì pitànàaca nalí cuyàluta", íimaca yái Cáurica, yái Wáiwacali Jesucristoca.

El mensaje a Tiatira

¹⁸Néese Wáiwacali íimaca nulí àniwa: “Pitànàa yái tàacáisica irí yáara nacuerínásàiri icuèrica wenàiwicanáí yeebáidéeyéica nutàacái Tiatira iyacàlená iricu: ‘Cài núumacuéca pirí, núa Dios Iirica, núa idènièrica ituíwa càide iyúwa quicháí ipèrùa iyáaná, núa idènièrica nacái yàabàliwa càide iyúwa naquéesièrica bronce nacáirica iicácanáwa. ¹⁹Núalíacawa ìwali yái pimàníiricuéca. Núalíacawa cáininácuéca piicáca áibanáí, núalíacawa peebáidacuéca nutàacái. Núalía nacáíwa piyúdàacuéca áibanáí, piideniacuéca piùwichàanáwa nacái matuíbanáiri iyú. Núalíacawa pimànicuéca cayábéeri cachàiníwanáí íicha yái pimàníiricatécué quéecha, pidàbacaalítécué peebáidaca nutàacái. ²⁰Quéwa nuicácué pìwali áiba wawàsi quiríta. Pidécuéca pimàacaca ùyaca matuíbanáita pèewibàa, úái inanáica Jezabelca. Nacàlidaca uináwaná utàanicasa Dios inùmaliçuise, quéwa uéwáidaca wenàiwica cachìwéeri tàacáisi iyú meedá uchìwáidacaténá nùasu wenàiwica naimáanápiná áiba yáapicha càmfíchúaca náinusíwa, càmfírìca nacái nanìrisíwa, nayáanápiná nayáacaléwa nacái iinási nanuérica ídolo irí nàacaténá cuwáinái yéenáiwaná icàaluíná. ²¹Nudéca nùalàaca úa cachàiníri iyú uwènúadánápiná úíwitáisewa ubáyawaná íichawa, quéwa càmita uebá uwènúadánápiná úíwitáisewa íicha, yái uimáanáca manùbéeyéi yáapicha. ²²Siùcade, péemiacué cayába, nùuwichàidapíná úa uláicái iyúwa, macáita nacái iiméeyéica úapicha, núucapíná níawa manuírì yùuwichàacáisi iriculéwa, càmicaalí nawènúada náíwitáisewa nabáyawaná íichawa, yái báawéerica namàníirica úapicha. ²³Nunúapíná nacái uénibe yéetácáisi iyú. Néese macáita yeebáidéeyéica nutàacái yàcalé imanùbaca, néemiapínacaalí uináwaná ìwali, yásí náalíacawa núacata yái iiquéerica náíwitáise, nawàwa nacái. Yásí numànicuéca pirí cayábéeriwa, nùuwichàidapíná nacáíwa píalimáwanama càide iyúwa imanuícanamacué pimànica cayábéeri, báawéeri áibata. ²⁴Néese píacué Tiatira iyacàlená mìnánáì càmfíyéica yeebáida Jezabel

itàacái, càmfíyí nací yéewáidawa tàacáisi ìwali yáara náiméerica ìwali Satanás yàasu íiwitáise ibàacanéeriwa. Núumacué pirí, iyaca quiríta abéeri wawàsi iwàwacutéeri nuchùllìpinácué pimànica. ²⁵Peebáidacué mamáalàacata nutàacái càide iyúwacué peebáidáaná siùca àta nùanàacatalépináta. ²⁶Cawinácaalí imawèniadéeyéica báawéeri, imàníyí nací mamáalàacata càide iyúwa nuwàwáaná àta néetácatalétawa, numàacaca nacùaca núapicha macái èeri mìnaná. ²⁷Càide iyúwa Núaniri Dios imàacáaná nucùaca èeri mìnaná Dios íiwitáise iyúwa, càita nací nùasu wenàiwica nacùapiná èeri mìnaná cachàiníiri iyú, nàuwichàidapiná nací macáita wenàiwica càmfíyéica yeebáida nutàacái, càide iyúwa hierro ibaquiadacaalí catùachúmáanamata yémáanáami. ²⁸Numàaca nací nàyaca nucamaláná írìcu, yái nucamaláná icànéerica càide iyúwa dùlupùta icànáaná waiquéerica mapisáisiwata. ²⁹Càuwíyéicaalícué pía, péemíacué cayába yái tàacáisica Espíritu Santo icàlidéerica wenàiwicanái írì yeebáidéeyéica nutàacái, iyéeyéica yàcalé imanùbaca, càì pitànàaca nalí cuyàluta”, íimaca yái Cáurica, yái Wáiwacali Jesucristoca.

El mensaje a Sardis

3 ¹Néese Wáiwacali íimaca nulí àniwa: “Pitànàa yái tàacáisica írì yáara nacuèrinàsàiri icuèrica wenàiwicanái yeebáidéeyéica nutàacái Sardis iyacàlená írìcu: ‘Cài núumacuéca pirí, núa iyéerica yáapicha yái Espíritu Santoca máiníiri cayábaca, núa idènièrica nací siete namanùbaca dùlupùta: Núalíacawa ìwali macáita píibaidacalécuéca. Nuémíacué piináwaná ìwali cáucasacué pía, quéwa nuicácuéca pía càiyéide iyúwa yéetéeyéimiwa. ²Pimichàidacué píiwitáisewa, pichàiniadacué píiwitáise cayábéeriwa iyéericuéca pirí quiríta, iwàwéerica ichàbacawa píicha, nuicácáiná yái pimàníricuéca càmfírìca cayába Nucuèriná Dios íicáca. ³Iná píináidacuéwa ìwali yái tàacáisi péemíericatécué, peebáidéericatécué nací quéechacáwa. Pimànicué mamáalàacata cayábéeri càide iyúwa yái tàacáisi íimáaná. Pìwènúadacué píiwitáisewa píbayawaná íichawa. Càmicaalícué pimichàida píiwitáisewa, yásì nùanàacué pìatalé càide iyúwa cayéedéeri yàanàacaalí càmicatáita wenàiwica icùa nùanàaca, càmitacué nací píalíawa chácaalínacaalí nuénáiwaná yàanàa nùanàacatáipinácué pìatalé. ⁴Quéwa abénaméeyéicué péená Sardis iyacàlená mìnaná càmita nàya cabáyawanéeri iyú. Càide iyúwa wenàiwica icùacaalí masacàata ibàlewa, càita nací abénaméeyéi péenacué nacùaca níawawa masaquèeri iyú, báawéeri

íicha. Yá áiba èeripiná nèepunicawa núapichawa nabàle cabalèeri yáapichawa namànicáiná cayábèeri càide iyúwa Dios iwàwáaná cháí èeri írìcu. ⁵Cawinácaalí imawènìadéeyéica báawéeri, nadèniapiná nabàlewa cabalèeri. Càmita nacái nutunúa náipidená cuyàluta írìcuise yái cuyàlutaca idènièrica náipidená macáita cáuyéica càmfíyéica imáalàawa. Yá nucàlidapiná naináwaná ìwaliwa nùasunáica nía Núaniri Dios íríwa, yàasu ángelnái írì nacái. ⁶Càuwíyéicaalícué pía, péemiacué cayába yái tàacáisi Espíritu Santo icàlidéerica wenàiwicanái írì yeebáidéeyéica nutàacái yàcalé imanùbaca', càì pitànàaca nalí cuyàluta", íimaca yái Cáurica, yái Wáiwacali Jesucristoca.

El mensaje a Filadelfia

⁷Néese Wáiwacali íimaca nulí àniwa: "Pitànàa yái tàacáisica írì yáara nacuerínásàiri icuèrica wenàiwicanái yeebáidéeyéica nutàacái Filadelfia iyacàlená írìcu: 'Cài núumacuéca pírì, núa Mabáyawanéerica, núa yái Báisiirica, núa rey David itaquérinámica, imàaquéerica nacái wenàiwica iwàlùacawa Dios iyacàle írìculé, Dios icùacataléca macáita. Nùacùacaalí nalíni, yá canáta yáaliméeri ibàliaca náichani. Néese nubàliacaalí náichani, canácata nacái yáaliméeri yàacùaca nalíni. Péemiacué: ⁸Cayábaca nuicáca yái pimàniiricuéca. Péemiacué cayába, numàacacué picàlidaca nuináwaná ìwali áibanái írì, càmitacué nacái yéewa nasàiwicaca pírì wawàsi, peebáidacáinacué nutàacái, càmitacué nacái piwènúada píiwitáisewa nuícha, éwitacué càmicáaníta máiní cachàinica pía. ⁹Péemiacué cayába. Nàyaca piyacàle néeni abénaméeyéi judío icàlidéeyéica iináwaná ìwaliwa judósíwacasa nía, quéwa nachìwa meedá, càmicáiná neebáida nutàacái báisiiri iyú. Satanás yéewáidacaléca nía meedá. Mesúnamáita numàacapiná nabàlùacawa nàulù ipùata iyúwa píipunitacuéwa nàacaténacué picàaluíniná. Yásí náalíacawa cáininácuéca nuicáca pía. ¹⁰Pidécuéca peebáidaca nutàacái piidenàcaténacué piùwichàanáwa matuíbanáiri iyú, ínà nucùapínacué píawa áibaalípiná yùuwichàacáisi yànàapínacaalí macái cáli ìwali, yùuwichàidacaténá èeri mìnánái. ¹¹Nùacawa néese caquialéta. Peebáidacué tàì íiméeri iyú yái peebáidéericuéca; picácué pimàaca áibanái iwènúadacuéca nuícha píiwitáise ipíchanacué piúcaca píchawa piasu cawèníiri coronawa Dios iwàwéericuéca yàaca pírì áiba èeriwa. ¹²Cawinácaalí imawènìadéeyéica báawéeri, numàacapiná nàyaca Nucueríná Dios yáapicha càiripináta, càide iyúwa àicu írìcusi ibàlùeriwa càiripináta Dios yàasu templo írìcuírìca.

Canácatáita nàawa Dios ícha. Nutànàapíná nacái Nucuèriná Dios ípidenáwa nàwali yái Nucuèriná Dios ìyacàle ípidenáwa nacái, yái yàcalé ípidenéerica Wàlisài Jerusalén, iricuèripínácawa chènuníse Nucuèriná Dios yàatanáise. Nutànàapíná nacái nuípidená wàlisàiwa nàwali. ¹³Càuwiíyéicaalícué pía, péemiàcué cayába yái tàacáisi Espíritu Santo icàlidéerica wenàiwicanái irí yeebáidéeyéica nutàacái yàcalé imanùbaca', càì pitànàaca nalí cuyàluta", ímaca yái Cáurica, yái Wáiwacali Jesucristoca.

El mensaje a Laodicea

¹⁴Néese Wáiwacali ímaca nulí àniwa: "Pitànàa yái tàacáisica irí yáara nacuèrinásàiri icuèrica wenàiwicanái yeebáidéeyéica nutàacái Laodicea ìyacàlená irìcu: 'Cài núumacuéca pirí, núa ípidenéerica Báisiiri, càmiíríca ichìwáida wenàiwica, núa icàlidéerica báisiiri iyúni, núa idàbéericaté macáita Dios irípiná cháì èeri irìcu: ¹⁵Núalíacawa ìwali yái macáita pimàníricuécá. Núalíacawa càmitacué máini píwènúadaca núcha píiwitáisewa, càmitacué nacái máini pimichàida píiwitáisewa peebáidacaténa cayába nutàacái. Iwàwacutácué píináidacawa càinácaalí pimànínápíná. ¿Píwènúadapínásicué núcha píiwitáisewa? ¿Néeni, pimichàidapínásicué píiwitáisewa? ¿Càinásicué pimànipíná? ¹⁶Néese, càmicáinácúé peebáida cayába nutàacái macái píwàwalícuésewa, íná núucapínácúé núchawa pía. ¹⁷Picàlidacáinácúé càì píwaliwa: "Càasuíyéica wía, máini nacái cayábaca wía. Wadéca weedáca walíwa manùba wàasupínáwa. Càmita wawàwacutá Dios iyúudàaca wía", càicué píimaca píwaliwa. ¿Cánácúé càmita píalíawa cáuláicaca píiwitáise píbáyawaná iyúwa? Dios iicácuéca pía càiyéide iyúwa catúulécanéeyéi, màasuíyéi nacái. Matuíyéicué nacái píiwitáise, báica nacáicué pía píbáyawaná ìwaliwa iyúwa mabàléeri wenàiwica. ¹⁸Iná nùalàacué pía pimàacáanápínácúé numànica pirí cayábéeri manuísíwata càide iyúwa wenàiwica iwéndacaalí áiba wenàiwica irí cayábéeri oro masaquèericaté namànica quicháì irìcu. Néese idécanáami numànicuécá pirí cayábéeri, yásì báisícata càasuíyéicuécá pía chènuníseeri cawèníri iyú. Peedácué nacái núcha píiwitáisepiná mabáyawanéeri càide iyúwacué píbàlepiná cabalèeri, ipíchanácúé báica pía píbáyawaná ìwaliwa. Pimàacacué nuchùnàaca píiwitáise matuírica càide iyúwa natuí idàbená ichùnàacaalí wenàiwica ituí, catuícaténácúé píiwitáise, píalíacaténácúéwa nùwali. ¹⁹Nùalàaca nùasunái cachàiníri iyú, macáita wenàiwica cáininéeyéica nuicáca.

Nùuwichàidaca nía nacái. Iná pimichàidacué píiwitáisewa càiripináta, piwènúadacué nacái píiwitáisewa pibáyawaná íchawa. ²⁰Péemiacué cayába, mesúnamáita nùacawa néese, càide iyúwa wenàiwica ibàlùacaalíwa capii íipunita imáidacaténá wenàiwica iyéeyéica capiiricu. Cawinácaalí yéemièyéica nutàacái, nawàwacaalí neebáidaca nutàacái, yá càica níade iyúwa wenàiwica yàacùacaalí icapèe inùmawa áiba irí, yeedácaténá yàataléwani. Néese cawinácaalí yeebáidéeyéica nutàacái, yásí nùyaca náapicha, nàyaca nacái núapicha, càide iyúwa wenàiwica iwàlùacaalíwa capiiriculé iyáacaténá iyáacaléwa yéenanái yáapichawa.

²¹Cawinácaalí imawèniadéeyéica báawéeri, numàacapiná náawinacawa núapicha nùalubái ínatalé, nacùacaténá macáita núapicha, càitatéde iyúwa numawèniadánaté báawéeri, néese núawinacatéwa Núaniri Dios yáapichawa, yàalubái ínatalé nucùacaténá macáita yáapicha. ²²Càuwíyéicaalícué pía, péemiacué cayába yái tàacáisi Espíritu Santo icàlidéerica wenàiwicanái irí yeebáidéeyéica nutàacái yàcalé imanùbaca', càì pitànàaca nalí cuyàluta", íimaca yái Cáurica, yái Wáiwacali Jesucristoca.

La adoración en el cielo

4 ¹Néeseté idécanáami Wáiwacali càì íimaca nulí, yáté nuicáidaca chènuniré, yá péemiacué cayába, nuicáca abéeri capli inùma yàacùacanéerica. Néese idàbáanéeri tàacáisi nuemièricaté itàaníca nulí iyúwa cachàiníiri trompeta isàna, yácata tàacáisi íimaca nulí àniwa: "Pimichàawa sísaara. Yá núsáidaca pírí càinácaalí ichàbáanápínacawa áibaalípiná", íimaca nulí. ²Aquialénamata Espíritu Santo icùaca nuíwitáise manuísíwata, péemiacué cayába, Espíritu Santo imàacaca nuicáca cayábéeri yàalubáisi ibàlùèricawa chènunibàa. Nuicáca abéeri yáawinéericawa yàalubáisi ínata icùacaténá macáita. ³Yái yáawinéericawa yàalubáisi ínata càiride iyúwa waicáaná cuniéri íba cabalèeri íipidenéeri jaspe, iyúwa nacái waicáaná íba íipidenéeri cornalina quíiréeri, cuniéri nacái. Yá mèlumèluwaca àrawàli icànaca yàalubáisi itéese càide iyúwa waicáaná cuniéri íba esmeralda ipuléeri. ⁴Nàyaca yàalubáisi itéesebàa áiba veinticuatro namanùbaca yàalubáisi. Náawinacawa yàalubáisi ínata veinticuatro namanùbaca nacuèrinánái. Idènièyéi cabalèeri ibàlewa. Nadènia nacái nàasu coronawa yáawami orota náiwita ìwaliwa. ⁵Yái yáawinéericawa yàalubáisi ínata icànaca mamáalàacata iyúwa énu icànáaná, itàaníca nacái càide iyúwa wéemianá cachàiníiri énu isàna tiríricaalí. Nàyaca yàalubáisi íipunita

siete namanùbaca lámpara nacáiyéi idènièyéica icamaláwa, quichái ipèrùà nacáiri. Yái quicháica, yácata máiníri cayábaca Espíritu Santoca. ⁶Iyaca nacái calisa nacáiri yàalubáisi ípunita, abéeri calisa càiride iyúwa vidrio máiníri cuníaca. Yàalubáisi itéesebàa nàyacaté báinúaca cáuyéi ángel madécanéeyéi ituí naicácaténá napíchaléwa, naicácaténá nacái náinataléwa. ⁷Yái idàbáanéeri ángel cáurica càiride iyúwa león iicacánáwa. Pucháibáaná cáuri ángel àniwa càiride iyúwa toro iicacánáwa. Máisibáaná cáuri ángel àniwa càiri inànde iyúwa asiali. Báinúacáaná cáuri ángel àniwa càiride iyúwa áwa iicacánáwa idècunitàacá yáalanícawa. ⁸Níái báinúaca ángel cáuyéica nadèniaca seis namanùbaca nàanabáíwa náalimáwanama. Macái cáuyéi ipuniyéyiwa natuí iyúwa náinatabàawa, nalicúsewa nacái. Yá càí náimaca èeríapinama, táiyápinama mamáalàacata:

“iMabáyawanéericani, mabáyawanéericani,
mabáyawanéericani, yái Wacuèriná Dios cachàinírica
náicha canánama, yái ìyéericaté, ìyéerica nacái siùcade,
ìyéeripiná nacái càiripináta, càmfíri imáalàawa!” càí
náimaca.

⁹⁻¹⁰Néese idècunitàacá cáuyéi ángel nàaca icàaluíniná, nàaca nacái iyéininá, nàaca nacái irí cayábéeri, yái yáawinéericawa yàalubáisi íinata, ìyéerica càiripináta èeri càmfíri imáalàawa, yá veinticuatro namanùbaca nacuèrinánái náuwàa naliacawa nanùmáawawa irí, yái yáawinéericawa yàalubáisi íinata, nàacaténá icàaluíniná, yái ìyéerica càiripináta èeri càmfíri imáalàawa. Yá naliadaca nàasu coronawa yàalubáisi yàabàli idaní náasáidacaténá Dios yàasu wenàiwicaca nía. Yá náimaca irí:

¹¹“Máiní cayábéeri píiwitáise, pía Wacuèriná Wáiwacali Dios,
íná wàaca picàaluíniná, wàaca nacái píimiétacaná, wáalíaca
nacáíwa máiní cachàinírica pía, pidàbacáinaté macáita, yá
nàyacaté píiwitáise iyú, pidàbacáinaté nía”, càí náimaca
nacántàaca.

El rollo escrito y el Cordero

5 ¹Néeseté nuicáca cuyàluta iwawanèeriwa icáapiricu yéewápuwáise, yái yáawinéericawa yàalubáisi íinata. Yái cuyàluta iwawanèericawa idèniaca tàacáisi irìculéwa, íinatawáise nacáíwa. Yái cuyàluta nadacuèrica cayába siete namanùbaca nadacuèrica iyúni. ²Néese nuicáca áiba ángel cachàiníri. Yá isutáca yéemíawa nía macáita. Imaca

cachàiníri iyú: “¿Cawínásica wenàiwica Dios ibatèeripiná iwàsàaca yái nadacùanácani, yàcùacaténá yái cuyàlutaca?” ímaca yái ángelca. ³Quéwa canáca náicha níai chènuníiséeyéica, nía nacái iyéeyéica cháí èeri irícu, nía nacái yéetéeyéimicawa, canácata yáaliméeri yàcùaca cuyàluta, iléecaténátáni. ⁴Yá nuícháaníca manuísíwata canácáiná nàanèeri wenàiwica Dios ibatèeripiná yàcùaca cuyàluta, iléecaténáni. ⁵Néese abéeri néená níai nacuèrinánáica ímaca nulí: “Picá pícháaní quirínama. Piicáida irí cayába, yái israelita icuèrinásàiri, rey David itaquérinámica, idéca imawèniadaca báawéeri, yéewacaténá iwàsàaca siete namanùbaca nadacùanáca, yàacuèripiná nacái cuyàluta”, ímaca nulí.

⁶Néese nuicáca Cordero ibàluèricawa nèewi yái yàalubáisica, nía nacái báinúaca ángel cáuyéica, nía nacái nacuèrinánáica. Yái Cordero idèniaca icháunáwa bàaluitécáiná nanúacani iyúwa sacrificio. Idènia nacái siete namanùbaca ichàlewa, siete namanùbaca nacái ituíwa. Níai siete ituí ímáanáca càicanide iyúwa máiníri cayába Espíritu Santo Dios ibànùèrica macái cáli ínatalé. ⁷Néese Cordero yàaca yeedáca cuyàluta icáapi yéewápuwáise íficha, yái yáawinéericawa yàalubáisi ínata. ⁸Néese Cordero idécanáami yeedáca cuyàluta, yá báinúaca ángel cáuyéica, nía nacái veinticuatro namanùbaca nacuèrinánáica náuwàa naliacawa nanùmáawawa Cordero irí nàacaténá icàaluíná. Nacuèrinánái náalimáwanama nadèniaca arpa, nadènia nacái bacàa níawami orota ipuniyéyiwa pumèníri isàni iyú. Yái pumèníri isàni ímáanáca càicanide iyúwa nasutáaná Dios íficha, macáita Dios yàasu wenàiwicaca. ⁹Yá nacántàaca wàlisài canción Cordero irí. Náima nacántàaca cà:

“Dios imàacaca peedáca yái cuyàlutaca, piwasàanápiná nadacùanácani, pimàacacáinaté nanúaca pía iyúwa sacrificio, yá piwèniacaté wenàiwicanái píranámi iyúwa Dios irípiná nèewiise macái yàawiría, macái itàaníyéica áiba tàacáisi iyú nacái, macái wenàiwica nacái, macái cáli néeséeyéi nacái.

¹⁰Pidéca pimàacaca Dios yàasu wenàiwicaca nía, icuèyéipiná macáita píapicha, isutéeyéipiná nacái Dios íficha wenàiwicanái irípiná, yá nacùapiná macái cáli”, náimaca nacántàaca.

¹¹Yaté nuicáidaca néré, yá nuèmiaca madécaná ángel isàna ibàluèyécawa natéesebàa yái yàalubáisica, nía nacái báinúaca ángel cáuyéica, nía

nacái nacuèrinánáica. Nuicáca madécaná millones namanùbaca ángel, càmiyíeyí wenàiwica yáalimá iputàaca nía, càisimalénácaalí nía.

¹² Yá náimaca cachàiníiri iyú: “iWàacué Cordero icàaluíniná, yái Corderoca imàaquéricaté nanúacani iyúwa sacrificio, yácáiná Dios idéca imàacaca Cordero icùanápíná canánama, idéca imàacaca càasuírìcani, yái Corderoca! iMáiní cáalfacáirìcani yái Corderoca, cachàiníiri nacái íiwitáise! iCayábaca waicácani, wàacué nacái icàaluíniná, wàacué nacái irí cayábéeri!” càì náimaca níái ángelca.

¹³ Nuémìà nacái macáita Dios idàbéeyéica náimaca irí, macái iyéeyéica chènuniré, cáli fínatéeyéica nacái, nía nacái yéetéeyéimicawa, úni írìcuíyéica nacái, macáisíwa canánama náimaca Dios irí. Càì náimaca:

“iWàaca cayábéeri irí yái yáawinéericawa yàalubáisi fínata, irí nacái yái Corderoca! iCáimiétaquéri iyú waicáca nía, wàaca nacái nacàaluíniná! iMáiní cachàinica náiwitáise càiripináta, èeri cà míiri imáalàawa!” náimaca.

¹⁴ Néese báinúaca ángel cáuyéica náimaca: “iBáisíta, amén, càita nacái wáimaca!” càì náimaca. Níái veinticuatro namanùbaca nacuèrinánái nabàlùacawa nàululì iyúwa nàacaténá icàaluíniná, yái iyéerica càiripináta, cà míirica imáalàawa.

Los siete sellos

6 ¹ Néeseté nuicáca Cordero iwasàaca idàbáanéeri néená níái siete namanùbaca nadacùanáca cuyàluta iwawanèericawa. Yá nuémìaca abéeri néená níái ángel cáuyéica íimaca cachàiníiri iyú càide iyúwa tirírìcaalí: “iAqualé, pìa piicáca!” càì íimaca. ² Néeseté nuicáidaca néré. Yá, péemiacué cayába, nuicáca cabalèeri caballo. Yái asìali yáawinéericawa caballo fínata idèniaca demápu imàníiripiná iyú ùwicái. Yá náawináidaca corona íiwita iwali. Néese imawèniadaca yàacawa imawèniadacaténá mamáalàacata áibanái.

³ Néese Cordero iwasàaca pucháibáaná nadacùanáca cuyàluta, yá nuémìaca pucháibáaná cáuri ángel íimaca: “iAqualé, pìa piicáca!” càì íimaca. ⁴ Yá áiba caballo imusúacawa, máiní quíiréeri quéwa, càide iyúwa waicáaná irái. Nuicáca wenàiwica yáawinéericawa caballo fínata. Yá namàacaca imànínápíná ùwicái cháì èeri írìcu, ipíchaná wenàiwicanái nàyaca matuíbanáiri iyú, imàacáanápíná nacái wenàiwicanái inúayacacawa. Yá nàaca irí cáaléeri espada machete nacáiri báipunitácanaméeri caserúnica.

⁵Néese Cordero iwasàaca máisibáaná nadacùaná cuyàluta, yá nuémìaca máisibáaná cáuri ángel ímaca: “iAqualé, pìà piicáca!” càì ímaca. Yáté nuicáidaca néré. Yá, péemìacué cayába, nuicáca cúulíiri caballo. Yái yáawinéericawa caballo íinata idèniaca abéeri wapésáidáaná imiéri. ⁶Néese nuémìaca tàacáisi nacáiri cáuyéi ángel yèewibàa, yá ímaca: “Abéeri kilo trigo ituíná iwèníiri abéeri denario, yái abé èeri iwènicatáica. Máisiba kilo nacái cebada ituíná iwèníiri abéeri denario, picá quéwa pimàni báawéeri olivo inàlìmaná irí, uva ibànacalená irí nacái”, càì ímaca.

⁷Néese Cordero iwasàaca báinúacáaná nadacùaná cuyàluta, yá nuémìaca báinúacáaná cáuri ángel ímaca: “iAqualé, pìà piicáca!” càì ímaca. ⁸Néese nuicáidaca néré, yá péemìacué cayába, nuicáca áiba caballo éewéeri nacáiri. Yái yáawinéericawa caballo íinata íipidená Yéetácáisi. Aiba íipidenéerica Infierno yàacawa Yéetácáisi yáapicha. Namàacaca Yéetácáisi, Infierno nacái nanúanápiná madécaná èeri mìnánái. Macái néená níái báinúaqueeyéica wenàiwicaca, abéeri néená yéetácawa. Yá nanúaca wenàiwicanái ùwicái iyú, máapicái iyú nacái, uláicái iyú nacái. Nachùulìà nacái caluéyéi cuwèesi nanúanápiná wenàiwica.

⁹Néese Cordero iwasàaca cinconá imanùbaca nadacùaná cuyàluta, yáté nuicáca nacáucami altar yáapiré, níái Dios yàasu wenàiwicaca nanuéyéicaté neebáidacáinaté Dios itàacái, ìwalíise nacái yái tàacáisi báisíirica nacàlidéericaté wenàiwicanái irí. ¹⁰Néese náimaca cachàiníiri iyú: “Wacuèriná Dios mabáyawanéeri, wáalíacawa pimànica macáita càide iyúwa píimáaná machìwéeri iyú. ¿Chácaalínápinácaalí piùwichàidapíná èeri mìnánái ìwalíise yái nanúanáca wía?” càì náimaca. ¹¹Néese yàaca nalí cáaléeri nanáawanipíná cabalèeri. Yá ichùulliaa nacùanápiná achúmáanata èeri quiríta àta nanacáiyéi yéetacatalétawa íibaidéeyéica Náiwacali irípiná, nía nacái néenánáica iwàwacutéeyéica yéetácawa càide iyúwaté néetáanáwa.

¹²Néese Cordero iwasàaca seisná imanùbaca nadacùaná cuyàluta, yáté nuicáidaca néré, péemìacué cayába, nuicáca cáli icusúacawa cachàiníiri iyú, yá catáca èeri càide iyúwa waicáaná cúulíiri wáluma. Yá nacái macàpucuícaalí quéerica, quíiraca úa càide iyúwa waicáaná irái. ¹³Dùlupùta nacái nactaláacawa cáli ínatalé càide iyúwa higuera yéetaná imàacacaalí icaláacawa iyacanáca éemíirica cachàinicáiná cáuli ipùaca ìwali. ¹⁴Yá capíraléeri cáli icacanácawa chènuníise càide iyúwa wáluma icacanácaalíwa. Néese iwawanàacawa abéemàalé,

abéemàa néese nacái càide iyúwa cuyàluta ibáiná iwawanàacaalíwa. Yá canáca capìraléeri cálimica. Yá macái dúli manuínaméeyéi, macáita nacái iwàwata nachacàacawa nàyacatái íchawa. ¹⁵Néese macáita èeri mìnaná nabàacawa íba yéecalicubàa, íba isabàlicubàa nacái. Macáita nabàacawa, níai èeri mìnaná icuèrinánáica, nía nacái wenàiwica íiwacanánáica, nía nacái úwi íiwacanánáica, nía nacái càasuíyéica, nía nacái cachàiníyéica úwica, macáita èeri mìnaná canánama, nía nacái íbaidéeyéica mawèníiri iyú áibanái irí, nía nacái yèepuníyéica máiwacalináwaca. ¹⁶⁻¹⁷Yá náimaca manuínaméeyéi dúli irí, manuínaméeyéi íba irí nacái: “iPicaláacuéwa wáinatabàa, pibàacué wía ituí ícha, yái yáawinéericawa yàalubáisi ínata, ícha nacái Cordero yàasu yúuwichàacáisi ibànuèripináca wàwali! Idéca yàanàaca wéenáiwana nàuwichàidacatáipináta wía, yá canácata wéená yáaliméeri lideniaca nàasu yúuwichàacáisica”, càì náimaca.

Los señalados de las tribus de Israel

7 ¹Idécanáamité nuicáca càì, yá nuicátaté áiba yéenáiwanási nacáiri, yá nuicáca báinúaca ángel ibàluèyéicawa chènuniré, iwicábùba yái èeriquéi macáirica. Yá náibàaca macái cáuli ipíchaná cáuli ipùaca cáli ìwali, manuíri úni ìwali nacái, àicunái ìwali nacái canánama. ²Néeseté nuicáca áiba ángel imichàacawa cáli ínatáise èeri imusúacatáisecawa. Yá ángel idèniaca cáuri Dios yàasu néenáiwanápiná. Angel icàlidaca nalíni cachàiníiri iyú, níai báinúaca ángel Dios yèeyéicaté ichàinipiná nàuwichàidacaténá cáli, manuíri úni nacái. Yá ímaca nalí: ³“iPicácué piùwichàida cáli, manuíri úni nacái, àicunái nacái càmicaalíca wachanàida Dios yàasu néenáiwanápiná napùdàlicu, níai Wacuèriná Dios yàasu wenàiwica íbaidéeyéica irípiná!” càì ímaca yái ángelca.

⁴Néese nuèmiaca càisimalénácaalí nía idènièyéica Dios yàasu néenáiwanápiná napùdàlicu. Namanùbaca nàyaca ciento cuarenta y cuatro mil namanùbaca israelitanái, nèewíise macáita israelita yàawiríanáica. ⁵Doce mil namanùbaca Judá itaquénáinámi idènièyéica Dios yàasu néenáiwanápiná napùdàlicu. Càita nacái doce mil namanùbaca Rubén itaquénáinámi. Càita nacái doce mil namanùbaca Gad itaquénáinámi. ⁶Càita nacái doce mil namanùbaca Aser itaquénáinámi. Càita nacái doce mil namanùbaca Neftalí itaquénáinámi. Càita nacái doce mil namanùbaca Manasés itaquénáinámi. ⁷Càita nacái doce mil namanùbaca Simeón itaquénáinámi. Càita nacái doce mil namanùbaca Leví itaquénáinámi. Càita nacái doce mil namanùbaca

Isacar itaquénáinámi. ⁸Càita nacái doce mil namanùbaca Zabulón itaquénáinámi. Càita nacái doce mil José itaquénáinámi. Càita nacái doce mil namanùbaca Benjamín itaquénáinámi.

La multitud vestida de blanco

⁹Idécanaámíté nuicáca càì, yá nuicáca áiba yéenáiwánási nacáiri, péemìacué cayába, yá nuicáca chinamáì wenàiwica canáca yáaliméeri iputàaca nía, macái íiwitáaná cáli néeséeyéi yéenáca, macái yàawiría yéená nacái, macái wenàiwica íiwitáaná yéená nacái, macái itàaníyéica áiba tàacáisi iyú íiwitáaná yéená nacái. Yá nabàlùacawa yàalubáisi íipunita, Cordero íipunita nacái. Nadèniaca cáaléeri nanáawani cabalèeriwa. Nadènia wisìri nacáiri ibáiná nacáapi iricuwa. ¹⁰Macáita náimaca cachàiníri iyú:

“iWacuèriná Dios, yái yáawinéericawa yàalubáisi íinata,
Cordero nacái, nadéca nawasàaca wía Dios yàasu
yùuwichàacáisi íicha!” càì náimaca.

¹¹Néese macáita ángel ibàlùeyéicawa yàalubáisi itéese, nacuèrinánái itéese nacái, báinúaca cáuyéi ángel itéese nacái, náuwàa naliacawa nanùmáawawa yàalubáisi íipunita nàacaténá Dios icàaluíniná. ¹²Yá náimaca:

“iBáisíta, amén! iWacàlidacué Wacuèriná Dios iináwaná
ìwaliwa cayábéericani, wàacué nacái icàaluíniná!
iMáiní cáalíacáica Wacuèriná Dios, wàacué íri cayábéeri,
cáimiétaquéeri iyúcué waicácani, máiníri cachàinica
íiwitáise càiripináta èeri càimíri imáalàawa! iBáisíta, amén!”
càì náimaca.

¹³Néeseté abéeri néená níái nacuèrinánáica isutáca yéemíawawa núa. Yá íimaca nulí: “¿Píalíasica cawinácaalí níái idènièyéica cáaléeri nanáawani cabalèeriwa, síisáanácaalí nacái nàanà?” càì íimaca nulí. ¹⁴Néese núumaca íri: “Càmita núalíawawa. Pimàni nulí cayábéeri, picàlida nulíni”, núumaca íri. Néese íimaca nulí: “Nadéca namusúacawa manuírì yùuwichàacáisi íicha. Dios idéca imàacaca iwàwawa nabáyawaná íicha, neebáidacáiná Cordero itàacái, yái Cordero yéetéericatéwa nabáyawaná iwálíise.

¹⁵“Iná yéewa nàyaca Dios yàasu yàalubáisi íipunita. Náibaida íripiná táiyápinama, èeríapinama nacái yàasu templo chènuníiséeri írìcu. Yái yáawinéericawa yàalubáisi íinata ìyaca náapicha icùacaténá nía.

16 Càmita quirínama máapica nía, càmita quirínama macàla nawàwa nacái. Càmita èeri yeemá nía. Uuléeri nacáywa càmita íisa nía quirínama.

17 Yái Cordero iyéerica yàalubáisi íipunita icùapiná nía. Uuléeri nacáywa càide iyúwa pastor icùacaalí ipìranái ovejawa cáininéeri iyú. Yá Cordero imàacaca nàiraca úni yèerica nacáuca cà míiri imáalàawa. Dios nacái itunúapiná náicha natuíyáa”, càí íimaca nulí.

El séptimo sello y el incensario de oro

8 1 Néese nuicácaté Cordero iwasàaca cuyàluta íichani, yái sietená namanùbaca nadacùanácani, yá masànaca macáita chènuniré cawàwanáta media hora. 2 Néese nuicáca siete namanùbaca ángel ibàluèyéicawa Dios íipunita. Yàaca nalí siete namanùbaca trompeta. 3 Néese áiba ángel yàanàaca. Idèniaca quichái yàalu oro yáawamírica. Yá ángel ibàluacawa altar íipunita. Nàaca irí manùba pumèníiri isàni. Yèewiàdaca pumèníiri isàni nèewi níái nasutáanaca Dios íicha, macáita Dios yàasu wenàiwicaca. Néese ángel yeemáca pumèníiri isàni altar íinata, yái altar oro yáawamírica ibàluèricawa yàalubáisi íipunita. 4 Càita pumèníiri íisalená imichàacawa ángel icáapi íicha chènuniré Dios íipunita, yáapicha yái nasutáanaca Dios íicha, níái Dios yàasu wenàiwicaca. 5 Néese ángel yeedáca quichái yàaluca, yá ipuniáadaca yàalu quichái iyú altar íinatáiséeri quicháica. Néese ángel yúucaca quichái yàalu chènuníise cáli íinatalépiná. Yá nuèmiaca madécaná énu isàna, madécaná tàacáisi nacái. Nuicáca madécaná énu icànaca mèlumèluwaca. Cáli nacái icusúacawa.

Las trompetas

6 Néese níái siete namanùbaca ángel idènièyéica siete namanùbaca trompeta nabàluacawa napùliacaténá nàasu trompetawa.

7 Yái idàbáanéeerica ángel ipùliaca yàasu trompetawa. Yá granizo íba nacáiyéi yúuwàacawa cáli íinatalé quichái yáapicha yèewièricawa irái iyú. Yá yeemáca madécaná cáli. Macái néená níái máisibéeyéica cálica, abéeri néená yeemácawa. Yeemáca nacái manùbéeyéi àicu. Macái néená níái máisibéeyéica àicuca, abéeri néená yeemácawa. Yeemáca nacáywa macáita masicái iyéerica cáli íinata.

8 Néese pucháibáaná ángel ipùliaca yàasu trompetawa. Yá áiba wawàsi yúuwàacawa manuíri úni yáaculé, yái wawàsi manuírca

dúli nacáiri iicácanáwa, yeeméericawa quichái iyú. ⁹Néese madécaná manuíri úni nachacamàacawa irái iyú. Macái néená níái máisibéeyéica manuíri única, abéeri néená ichacamàacawa irái iyú. Manùbéeyéi néetácawa iyéeyéica manuíri úni yáaculé. Ata alénacaalí manuíri úni ichacamàacawa irái iyú, yá macáita néetácawa iyéeyéica úni yáaculé, càita nacái manùbéeyéi nave imáalàacawa, lancha nacáiyéica yèeyéicawa úni yáacubàa. Macái néená níái máisibéeyéica naveca, abéeri néená imáalàacawa náicha.

¹⁰Néese máisibáaná ángel ipùliaca yàasu trompetawa. Yá manuíri dùlupùta nacáiri yúuwàacawa chènuniise yeeméericawa cachàiníiri quichái iyú. Yá dùlupùta nacáiri yúuwàacawa madécaná inanába yáaculé, únibàa nacái, úni imusúcatáiscawa cáli iricúise nacái. ¹¹Yái dùlupùta ípidenéeri Ipisíiri. Yá macái néená níái máisibéeyéica única, abéeri néená ichacamàacawa ipisíiri iyú. Yá madécaná wenàiwica néetácawa úni iyú, ipisíiricáináni.

¹²Néese báinúacáaná ángel ipùliaca yàasu trompetawa. Yá imáalàacawa máisibáaná néená èeri icamalánaca, máisibáaná yéená nacái quéeri icamalánaca, máisibáaná néená nacái níái dùlupùta nacamalánaca. Càita catáca máisibáaná néená nacamalánaca. Càmita nacái nacàna máisibáaná néená èerápi, táiyápi nacái.

¹³Néeseté nuémìaca néré, yá nuémìaca áiba ángel áwa nacáiri imáidaca cachàiníiri iyú idècunitàacá yáalanícawa cáli iwicáubàa machacànita. Yá ímaca: “iMáinícué piùwichàapínacawa, píacué èeri mínanáica báawéeyéica íiwitáise, casànapinácaalí áiba trompeta mamáalàacata, áiba máisiba ángel ipùlièyéipínaca mesúnamáita!” càì ímaca.

9 ¹Néeseté nuémìaca cinconá imanùbaca ángel ipùliaca yàasu trompetawa. Yá nuicáca áiba ángel dùlupùta nacáiri iicácanáwa iricuèricatéwa chènuniise cáli ínatalépiná. Nàaca irí llave yàacùcaténá utàwi inùma yái máiníirica depuúwaca. ²Néese ángel yàacùaca utàwi inùma máiníirica depuúwaca. Yá ísa imichàacawa utàwi inùma iricúise càide iyúwa yùucaniasi íisalená. Yái ísa utàwi iricúiséerica catáca imànica èeri icamaláná, macái cáuli nacái. ³Néese wiriichu nacáiyéi namusúacawa ísa yèewíise, yá nàacawa cáli ínatabàa. Níái wiriichu nacáiyéica nadènìaca náiwíwa náucacaténá wenàiwica càide iyúwa chálía yúucáaná wía. ⁴Iwàwacutápiná càmita nàuwichàida masicái idàwinèericawa cáli íinata, macái bànacalé nacái, macái àicu nacái canánama. Abéta iwàwacutápiná nàuwichàidaca wenàiwica canéeyéica

irí Dios ípidená napùdàlicu. ⁵Iwàwacutápiná nàuwichàidaca wenàiwica cinco imanùbaca quéeripiná, càmita quéwa ibatàa wiriichu inúaca wenàiwica. Yái icáicha cáiwica wenàiwica iríni càide iyúwa chália yúucáaná wía.

⁶Néenialípiná wenàiwica nacutáca néetácáténáwa quéwa càmita náalimápiná néetácawa. Máiní nawàwapiná néetácawa, quéwa yéetácáisi càmiripiná íbàa nía.

⁷Níái wiriichu càica níade iyúwa caballonái úwinái ichùnièyéica namànicaténá ùwicái. Nadènià corona oro yáawamíiri náiwita ìwaliwa. Wirlichunái càiyéi inànde iyúwa wenàiwica inàni. ⁸Nadèniaca nacái náiwita ibáináwa càide iyúwa inanái íiwita ibáiná. Nadènià nacái nayéiwa càide iyúwa león cháwi nacáiri iyéi. ⁹Nadèniaca náimamiwa càide iyúwa hierro nàucutalìcuwa, ipíchaná áibanái isutàaca nía. Casànaca nàanabái idècunitàacá náalanícawa càide iyúwa wéemianá manùbéeyéi caballo yàabàli isàna ipiacawa itéeyéica madécaná carro ùwicái nérépiná. ¹⁰Nadèniaca nacái nasìpiwa càide iyúwa chália íwi. Náiwí idènièrica icáichawa yùuwichàidacaténá wenàiwica cinco quéeripiná. ¹¹Níái wiriichu nadèniaca náiwacaliwa, yái ángel icuèrica utàwi máiníríca depuífaca. Angel ípidená Abadón hebreo itàacái iyú, Apolión griego itàacái iyú, ímáanáca “Imáalàidéeri wía”.

¹²Yácata idàbáanéeri yùuwichàacáisi manuíríca yàanèeripináca èeri mìnaná ìwali. Péemíacué cayába, nàyaca pucháiba yùuwichàacáisi mamáalàacata yàanèyéipiná mesúnamáita.

¹³Néese seisná ángel ipùliaca yàasu trompetawa. Yá nuémíacaté tàacáisi imusuéricawa nèewíise níái altar iculuwí báinúaca, yái altar oro yáawamíríca, ìyérica Dios ípunita. ¹⁴Yái tàacáisi ímaca seisná ángel irí ipùlièrica yàasu trompetawa: “Pibasàa báinúaca ángel idacuèyéicawa manuírí inanába néenibàa ípidenéeri Eufrates”, càì ímaca. ¹⁵Yá iwasàaca báinúaca ángel nanúacaténá madécaná èeri mìnaná. Macái néená níái máisibéeyéica wenàiwicaca abéeri néená yéetápinácawa náicha. Níái báinúaca ángelca Dios idacùacaté nía iwasàacaténá nía áiba èeripiná. Abéerita Dios yáaliéricawa càinácaalí horapiná, èeripiná nacái, quéeripiná nacái. ¹⁶Nuémíaca càisimalénácaalí úwinái níái yèeyéipinácawa caballo íinata. Nàcawa doscientos millones namanùbaca úwináica.

¹⁷Nuicáca càì níái caballoga yéenáiwanási nacáiri írícúise. Níái yèeyéicawa caballo íinata nadèniaca nabàle dàaléeriwa nàucutabàawa, yái dàaléeri bàlesica quíiréeri, capìraléeri nacái, éewéeri nacái.

Caballonái nadènìaca náiwitawa càide iyúwa león cháwi nacáiri íiwita. Imusúacawa caballonái inùmalìcuíse: quichái, ísa nacái, azufre nacái, yái éewéeri íba yeeméericawa máini ùlúleri iyú. ¹⁸Yásí madécaná èri mìnanaí néetápináwa, iyú yái imusuéricawa caballonái inùmalìcuíse, yái quichái, ísa nacái, azufre nacái. ¹⁹Níai caballocala nadènìaca nachàiniwa nanùma irìcuísewa, nasìpi néeni nacáiwa. Nasìpi ipùata càiri iicacánáwade iyúwa àapi íiwita. Nasìpi iyúwa nanúapiná wenàiwica.

²⁰Quéwa níai wenàiwicaca iyéeyéicáwaca mamáalàacata, camíyécáwaca caballonái inúaca, camita nawènúadapiná náiwitásewa ícha yái báawéerica namànírica. Camita nayamáida nàaca demonio icàaluíniná, ídolo icàaluíniná nacái, yái cuwáinái yéenáwaná oróirica, platéeri nacái, broncéeri nacái, íbéeri nacái, àicuírí nacái. Níara ídolocala camita náalimá naicáca, camita nacái néemìa, camita nacái nèepuníwa. ²¹Camita èri mìnanaí iwènúada íiwitásewa ícha yái nanúanaca wenàiwica, namànínáca nacái namàliyéidewa, nayéedúaná nacái, naimáaná nacái áiba yáapicha camíichúaca náinusíwa, camíirica nacái nanìrisíwa.

El ángel con el rollito escrito

10 ¹Néeseté nuicáca áiba cachàiníiri ángel iricuèricawa chènuníse. Yá yéepuèriwa acalèe iyú, idènìaca àrawàli íiwita itéesebàawa. Inàni icànaca càide iyúwa èri icànáaná. Càiri icàwade iyúwa waicáaná quichái. ²Idènìaca cuyàluta icáapi irìcuwa, abéeri cuyàluta achúméeríina yàacúacanéerica. Yá ángel ibàlùadaca yàabàli yéewápuwáisewa manuírí úni yáaculé. Yá ibàlùadaca abéemàa yàabàli apáuwáisewa chuítaliré. ³Néese imáidaca cachàiníiri iyú càide iyúwa león cháwi nacáiri íchacaalí. Idécanáami imáidaca, yá siete namanùbaca énu natàaníca nasàna iyúwa. ⁴Idécanáami casànaca énunái, yá nuínáidacawa nutànàanápínaté énunái itàacái, quéwa nuémìaca tàacáisi chènuníiséeri. Yá íimaca nulí: “Pibàa tàacáisi áibanái ícha, yái tàacáisi siete namanùbaca énu náiméerica ìwali. Picá pitànàa yái náiméerica ìwali”, càì íimaca nulí.

⁵Néese yái ángel nuiquéerica ibàlùèricawa manuírí úni yáaculé, chuítaliré nacái, yá imichàidaca icáapi yéewápuwáisewa chènuniré. ⁶Yá icàlidaca Dios yàasu tàacáisi cáimiétacanéeri iyú, yái Dios iyéerica càiripináta èri camíiri imáalàawa, yái idàbéericaté capíraléeri cáli, nía nacái chènuníiséeyéi cáli, nía nacái iyéeyéica cháì èri

irìcu, manuírì úni nacái, nía nacái iyéeyéica úni yáaculé. Yá íimaca: “Càmìta quirínama Dios idècunìawa. ⁷Yá yàanàpinácaalí sietená ángel yéenáíwaná idàbacatáipináta ipùliaca yàasu trompetawa, yásí Dios imáalàidapiná imànicani, yái ibèricaté wenàiwicanái íicha, càide iyúwa icàlidáanáté yàasu wenàiwicanái iríwa, níái profetaca”, càì íimaca.

⁸Néseté nuémìaca àniwani yái tàacáisi chènuniíséerica. Itàaníca núapicha àniwa, íimaca nulí: “Pìa peedáca cuyàluta yàacùacanéerica icáapirìcu yái ángel ibàluèricawa manuírì úni yáaculé, chuítaliré nacái”, càì íimaca nulí. ⁹Néese nùacawa ángel yàatalé, yá nusutáca íichani yái cuyàluta achúméerínaca. Yá yàaca nulíni. Íimaca nulí: “Peedáni, piyáani. Idècunitàacá piyáacani, yá puchìchacani pinùma irìcu càide iyúwa mába ituní, quéwa piyapicúa irìcu, yásí ipisícani”, íimaca nulí.

¹⁰Néese nuedáca achúméeríina cuyàluta ángel icáapi irìcuíse. Yá nuyáacani. Puchìchacani nunùma irìcu, quéwa idécanáami nuwetúacani, yá ipisícani nudèericuíse. ¹¹Néese náimaca nulí: “Iwàwacutá picàlidaca tàacáisi àniwa Dios inùmalìcuíse manùbéeyéi wenàiwica ìwali, manùbéeyéi cáli néeséeyéi ìwali nacái, nàwali nacái itàaníyéica áiba tàacáisi iyú, nacuèrinánái ìwali nacái”, náimaca nulí.

Los dos testigos

11 ¹Néseté nàaca nulí cáaléeri metro sitùa nacáiri. Yá nuémìacaté tàacáisi íiméerica nulí: “Aquialé, píalimáida Dios yàasu templo, nasutácaalu Dios íicha; píalimáida altar nacái, càisimaléná metrocaalí nadèniaca. Piputàa nacái càisimalénácaalí wenàiwica yèeyéica Dios icàaluíniná néenibàa. ²Picá quéwa píalimáida templo ibàacháwalená, néese pimàacani. Nadéca nàaca templo ibàacháwalená càmiíyéi judío irí. Yá nabawàidapináni nàabàli yáapiréwa yái yacalé mabáyawanéerica Jerusalén iyacàlená, idècunitàacá nacùapinàcani cuarenta y dos quéeriwa. ³Yá nubànùapiná pucháiba nùasu wenàiwicawa nacàlidacaténá nutàacái nunùmalìcuíse mil doscientos sesenta èeri. Nadèniapiná nabàlewa cúulíiri wáluma cáucuíri, iyúwa nabàle iyáaná níái íicháaníyéica yéetéeyéimiwa ìwali”, íimaca nulí.

⁴Níái pucháiba icàlidéeyéipináca tàacáisi Dios inùmalìcuíse, níacata pucháiba olivo yéetaná, níacata nacái pucháiba lámpara ibàluèyécawa Dios íipunita, yái icuèrica canánama. ⁵Aibacaalí iwàwa imànica nalí báawéeri níái pucháibaca, yásí quichái imusúacawa nanùmalìcuíse, níái pucháibaca, yá nemápináca macáita nàuwidenáíwa. Càita

iwàwacutá yéetácawa cawinácaalí iwàwéerica imànica nalí báawéeri. ⁶Níái pucháiba nadèniàpiná nachàiniwa nabàliacaténá capìraléeri cáli ipíchaná unía yúuwàacawa néenialípiná idècunitàacá nacàlidaca tàacáisi Dios inùmaliçuise. Nadènia nachàiniwa nacái nawènúadacaténá úni iráí iyú. Yá náalimá nabànùaca macái íiwítáaná yúuwichàacáisica cáli ìwali iyúwata nawàwáaná.

⁷Néese idécanáami namáalàidaca nacàlidaca tàacáisi Dios inùmaliçuise, yásí caluéri cuwèesi imusuéripinácawa utàwi depuúwéeri irìçuise imànipiná ùwicái náipunita. Imawèniadapiná níawa, yásí inúaca nía. ⁸Yá nachéecami irìapináwa carretera irìcubàa manuíri yàcalé irìcu, Jerusalén iyacàlená, áibanáimi itàtàacatalécaté Náiwacali cruz ìwali. Espíritu Santo imàacaca wáaliacawa Jerusalén iyacàlená mìnanáí nàyaca càide iyúwaté Sodoma iyacàlená mìnanáimi iyáanáté, iyúwa nacái Egipto yàasu cáli néeséeyéi iyáaná. ⁹Néese máisiba èeri y mediopiná manùbéeyéi wenàiwica macái cáli néeséeyéi naicáidapiná nachéecami irí, níái icàlidéeyéica tàacáisi Dios inùmaliçuise. Càmita nabatàapiná áibanáí ibàliaca nía. ¹⁰Casíimáipináca èeri mìnanáí iwàwa néetácanáamiwa níái icàlidéeyéimica. Casíimáica èeri mìnanáí iwàwa íná nàapiná nalíwáaca cawèníri, níacáiná pucháiba profetamica yúuwichàidaca èeri mìnanáí.

¹¹Quéwa máisiba èeri y medio idénáami, yásí Dios icáucàidapiná nía àniwa, yásí namichàapiná nabàlùacawa, yá máiní cáalupináca èeri mìnanáí iicáca níái pucháibaca. ¹²Néese néemiapiná cachàiníri tàacáisi chènuníiséerica. Yá ímapiná pucháiba irí: “iPimichàacuéwa sísaara!” càipiná íimaca nalí. Yásí namichàapinácawa chènuniré acalèe yèewiré nàuwidenáí yèewísewa. ¹³Yáta cáli icusúapináwa máiní cachàiníri iyú Jerusalén iyacàlená néenibàa, yá manùbéeyéi capìi náuwàapináwa. Macái néená níái diéyéica capìica, abéeri néená yúuwàapináwa. Yá siete mil namanùbaca Jerusalén iyacàlená mìnanáí néetápináwa cáli icusúacái iyú. Yá máiní cáalupináca wenàiwica iyéeyéica mamáalàacata. Yá nàapiná Dios icàaluíniná yáí iyéerica chènuniré.

¹⁴Yácata pucháibáaná yúuwichàacáisi manuíri yàanèripináca èeri mìnanáí ìwali, quéwa yàanàapiná caquialéta yáara máisibáaná yúuwichàacáisica.

La séptima trompeta

¹⁵Néese sietená ángel ipùliaca yàasu trompetawa, yáté nuémíaca cachàiníri tàacáisi chènuniré. Yá náimaca:

“Wáiwacali Dios icùapiná macái èeri mìnánái Cristo yáapichawa, yái Cristo Dios imàaquéerica icùaca canánama. Yá icùaca macáita càiripináta, èeri càmfíri imáalàawa”, càì náimaca.

¹⁶Néese veinticuatro namanùbaca nacuèrinánái yáawinéeyéicawa yàalubái íinatawa Dios ípunita náuwàa naliacawa nanùmáawawa Dios irí nàacaténá icàaluíná. ¹⁷Yá náimaca:

“Wàaca pirí cayábéeri, pía Wáiwacali Dios cachàinírira náicha canánama, pía iyéericaté bàaluté, iyéerica nacái siùcade, iyéeripiná càiripináta. Wàaca pirí cayábéeri cachàinicáiná píiwitáise. Pidéca pidàbaca picùaca macáita.

¹⁸Calúaca píapicha níái èeri mìnánáica, quéwa báawaca piicáca yái namánírira. Idéca yàanàaca néenáiwaná piùwichàidacatáipináta yéetéeyéimiwa báawéeyéi íiwitáise, piacaténá nacái cawèníri nalí, níái íibaidéeyéica pirípiná, nía nacái profeta icàlidéeyéica tàacáisi pinùmaliçuise, nía nacái piasu wenàiwicaca, nía nacái yèeyéica picàaluíná, sùmanái nacái, béeyéi nacái. Idéca yàanàaca néenáiwaná pimáalàidacatáipináta macáita cawinácaalí báawéeyéica imànica èeri mìnánái íiwitáise”, càì náimaca.

¹⁹Néeseté nuicáca Dios yàasu templo chènuníiséeri yàacùacawa, yá naicáca Dios yàasu yàalusi nacáiri templo iricúirica, yái yàalusica imàaquéerica nawàwalica Dios imànicaté wawàsi israelita yàawirináimi yáapicha icùanápináté nía. Néese manùba énu icànaca, néemiaca manùba tàacáisi, énu isàna manùba nacái, cáli icusúa nacáiwa, granizo manúnaméeyéi íba nacáiyéi yúuwàacawa cáli íinatalé nacái.

La mujer y el dragón

12 ¹Néeseté nuicáca manúiri yéenáiwanási nacáiri chènuniré, abéechúa inanái yéepuèchúawa èeri icamaláná iyú. Udèniaca quéeri ùabàli yáapíise. Udèniaca nacái corona úwita ìwaliwa, abéeri corona doce namanùbaca dùlupùta ìyaca ìwali. ²Idéerìcuíhúacáwa úái inanáica. Yá úícháanica cáiwicáiná ulíni umusúadacaténá iicá èeri. ³Néese nuicáca áiba wawàsi chènuniré, péemiacué cayába, nuicáca manúiri màanu quíiréeri quéwa. Idèniaca siete namanùbaca íiwitawa, diez ichàle imanùbaca nacái. Idèniaca corona íiwita ìwaliwa yáalimáwanama. ⁴Yái màanu íibàaca manùbéeyéi dùlupùta isipi iyúwa. Yúucaca nía cáli íinatalépiná. Macái néená níái máisibéeyéica dùlupùtaca,

abéeri néená icaláacawa cáli ínatalé. Yái mànuca ibàlùacawa inanái ípunita. Mànu icùaca iyáacaténá uìri idécanacáita imusúacawa. ⁵Uái inanái umusúadaca iicá èeri yái asìali icuèripináca macái èeri mìnánái cachàiníri iyú. Néeseta quéwa Dios yeedáca uìri chènuniré, ímáanáca Wáiwacali, yá Dios itéca yàataléwani yàalubái ínataléwa. ⁶Uái inanái upìacawa manacúali yùuculé, chuiri cáli nérépiná, canácatalé wenàiwica. Aléera iyaca ulí ùyacatalépiná, Dios ichùnìèricaté ulípiná. Néré nàapiná uyáapináwa mil doscientos sesenta èeripiná.

⁷⁻⁸Néese nuicáca namànica ùwicái chènuniré. Yái ángel íiwacaliná ípidenéeri Miguel, yàasu ángelnái nacái namànica ùwicái mànu ípunita. Yái mànuca, nía nacái yàasu ángelnáica, namànica ùwicái Miguelnái ípunita, quéwa Miguelnái imawèniadaca nía, íná mànunái càmita quirínama náalimá nàyaca chènuniré. ⁹Càita náucacani chènuníise yái manuírì mànuca, yái bàaluitéeri àpica ípidenéeri Diablo, ímáanáca “Icháawàidéeri waináwaná ìwali”, ípidenéeri nacái Satanás, ímáanáca “Wàuwidesàiri”, yái ichìwáidéerica macái èeri mìnánái. Yácata náuquéeri chènuníise cáli ínatalépiná, yàasu ángelnái nacái náucacawa yáapicha chènuníise.

¹⁰Néese nuémìaca cachàiníri tàacáisi chènuníise. Yá ímaca:

“Wacuèriná Dios idéca iwasàaca wía. Dios idéca yáasáidaca íiwitáise cachàiníriwa icùacaténá macáita. Dios imàacapiná Cristo icùaca yáapicha macáita, yái Cristo Dios ibànuèricaté. Idéca Wàuwidesàiri yúucacawa chènuníise, yái icháawàidéerica wéénánái iináwaná ìwali, icháawàidéerica naináwaná ìwali Wacuèriná Dios irí èeríapinama, táiyápinama nacái, icháawàaca naináwaná ìwali.

¹¹Wéénánái nadéca namawèniadaca Wàuwidesàiri neebáidacáiná Cordero itàacái, yái Cordero yéetéericatéwa wáichawalíná, nacàlidacáiná nacái naináwaná ìwaliwa Jesucristo yàasunáica nía, càmicáiná nacái nawènúadaca náiwitáisewa Jesucristo íicha éwita áibanái inúacáaníta nía.

¹²¡Casíimáicué piwàwawa, píacué ìyéeyéica chènuniré! ¡Quéwa píacué èeri mìnánáica, máinícué piùwichàapináca, yácáiná Diablo icháawàidéerica waináwaná ìwali, idéca iricùacawa chènuníise pìatalécué máiníri calúaca íiwitáise, yáalíacáináwa iyaca irí malééná èeri!” càì náimaca.

¹³Néese yái mànuca yáalíacáináwa náucacaténì chènuníise cáli ínatalé, yá ipìacawa úami úái inanái imusúadéechúaca iicá

èeri. ¹⁴Quéwa nàaca ulí pucháiba ùanabáipiná manuínaméeyéi úái inanáica, càide iyúwa áwa yàanabái, yéewanápiná úalacawa màanu fícha chuiri cáli nérépiná, canácatalé wenàiwica alé ùyacatalépiná, nàacatalépiná uyáapiná máisiba camuí y medio piná. ¹⁵Yá màanu imusúadaca úni inùmaliçúsewa inanái yáamiwáisepiná, càide iyúwa inanába, isicùmáidacatená úa yéesacái iyú, úái inanáica. ¹⁶Cálita quéwa iyúudàaca úa, yá yàacùacawa inùmasi nacáiri cáli yèewiré iwetúacatená inanába màanu imusúadéerica inùmaliçúsewa. ¹⁷Néese máini calúaca yái màanuca inanái yáapicha. Yá yàacawa imànicatená úwi náipunita níai uénibeca áibanái, yeebáidéeyéica càide iyúwa Dios ichùulianá nía, icàlidéeyéica nacái naináwaná ìwaliwa Jesús yàasunáica nía.

Los dos monstruos

13 ¹Néeseté nuicáca màanu ibàlùacawa manuíri úni icàinalená íinata, yá nuicáca cachàiníiri cuwèesi caluéri nacái imusúacawa manuíri únaiçúise. Yái cuwèesi idèniaca siete namanùbaca íiwitawa, diez namanùbaca nacái ichàle. Idèniaca corona ichàle ìwaliwa yáalimáwanama. Macái íiwita imanùbaca idèniaca íipidenáwa itàaníiyéica casaquèeri iyú Dios ìwali, icàlidéeyéica Dioscasa yái cuwèesica. ²Yái cuwèesi càiride iyúwa cháwi iicacánáwa. Idèniaca yàabàliwa càide iyúwa sálu yàabàli. Idèniaca nacái inùmawa càide iyúwa león cháwi quíréeri nacáiri. Néese màanu imàacaca íiwitáise cachàiníiriwa cuwèesi irí, yéewacatená caluéri cuwèesi ichùuliaca manùbéeyéi wenàiwica cachàiníiri iyú. ³Abéeri néená níai caluéri cuwèesi íiwitaca idèniaca icháuná báawéeriwa imàaquéericaté íiwita yéetácawa, quéwa cháunási ichùnìacawa, yá íiwita icáucàacawa àniwa. Yá macáita èeri mìnanáí máini nàináidacawa naicáidaca caluéri cuwèesi irí, neebáida nacái càide iyúwa ichùulianá nía. ⁴Yá wenàiwica nàaca màanu icàaluíniná yácáiná màanu imàacaca caluéri cuwèesi icùaca èeri mìnanáí. Nàaca nacái cuwèesi icàaluíniná. Náimaca: “Máini cachàiníiri náicha canánama yái caluéri cuwèesica. ¡Canácata yáaliméerica ipéliacani!” càì náimaca.

⁵Màanu imàaca nacái canùmaséecani, yái caluéri cuwèesica, itàanicatená casaquèeri iyú Dios ìwali. Yá imàacaca cuwèesi ichùuliaca èeri mìnanáí cachàiníiri iyú cuarenta y dos quèeri. ⁶Cuwèesi itàaníca casaquèeri iyú Dios ìwali, itàaníca nacái báawéeri iyú Dios íipidená ìwali, itàaníca nacái báawéeri iyú Dios ìyacàle ìwali, nàwali nacái níai

iyéyéica chènuniré. ⁷Màanu imàaca nacái caluéri cuwèesi imànica úwi Dios yàasu wenàiwicanái ípunita. Yá cuwèesi imawèniadaca nía. Màanu imàacaca cuwèesi ichùuliaca macái èeri mìnanaí. ⁸Macái èeri mìnanaí nàapiná caluéri cuwèesi icàaluíniná, cawinácaalí càmíiyéica idènià ípidená ichanèericawa Cordero yàasu cuyàluta irícu èeri ipíchawáiseté, yái cuyàluta idènièrica náipidená macái wenàiwicaca Cordero yèyéica icáuca càmíiri imáalàawa, yái Cordero nanuéricaté. ⁹Càuwíiyéicaalícué pía, péemiacué cayába yái tàacáisi núméesripinácuéca pirí:

¹⁰ “Iwàwacutácaalícué náibàaca pía, yásí náibàacué píawa; iwàwacutácaalícué nanúaca pía espada machete nacáiri iyú, yásí nanúacué pía espada iyúwa”, càicué númaca pirí.

Iná iwàwacutácué piideniaca piùwichàanáwa matufbanáiri iyú, peebáidacué mamáalàacata, píacué Dios yàasu wenàiwicaca.

¹¹Néese nuicáca áiba caluéri cuwèesi imusúacawa cáli irícuise. Idèniaca pucháiba ichàlewa càide iyúwa oveja ichàle, quéwa itàaníríca càide iyúwa màanu itàaníná. ¹²Idèniaca íwítáise cachàiníríwa imànicaténá macáita càide iyúwa idàbáanéeri cuwèesi imàníná idècunitàacá iyaca caluéri cuwèesi yáapicha. Yá ichùuliaca macáita èeri mìnanaí nàaca idàbáanéeri cuwèesi icàaluíniná, yái imichèericawa yéetácáisi íicha. ¹³Imàni yàacawa nacái madécaná yái càmíiríca áiba idé imànica, ichùuliaca nacái quichái yúuwàacawa chènuníise wenàiwicanái iicápiná. ¹⁴Yái idàbáanéeri caluéri cuwèesi imàacaca pucháibáaná cuwèesi imànica yáapicha yái càmíiríca wenàiwica idé imànica, ichìwáidacaténá èeri mìnanaí. Yá pucháibáaná cuwèesi ichùuliaca namànica caluéri cuwèesi yéenáiwaná yái idàbáanéerica cuwèesica idènièrica icháunáwa espada machete nacáiri yáami quéwa iyaca quiríta, cáucani. ¹⁵Namàacaca pucháibáaná cuwèesi yàaca idàbáanéeri cuwèesi yéenáiwaná icáucapiná. Yá ichàniadaca yéenáiwanási yéewanápiná itàaníca, ichùuliacaténá nacái nanúaca macái wenàiwica càmíiyéica yàa icàaluíniná, yái idàbáanéerica cuwèesi yéenáiwána. ¹⁶Ichùuliaca nacái natàanápíná cuwèesi yéenáiwaná macái wenàiwica icáapi yéewápuwáise iwali, càmicaalí nacáapi, néese napùdàlicu áibata, macái sùmanái, béeyéi nacái, càasuíyéi nacái, catúulécaneéyéi nacái, nía nacái yèepuníiyéicawa máiwacalináwaca, nía nacái íibaidéeyéica mawèníiri iyú áibanái irí. ¹⁷Iná canáca yáaliméeri iwèniaca, iwéndáanápíná nacái canácaalí irí yái cuwèesi yéenáiwána, yái cuwèesi ípidenáca, càmicaalí ípidená, néese ípidená yàasu número áibata.

¹⁸Iná iwàwacutá cáalíacáica wía. Péemiacaalícué càinácaalí íimáaná, yá iwàwacutácué píalíacawa cuwèesi yàasu número ìwali, wenàiwica yàasu númerocáináni. Yácata yái númeroca, seiscientos sesenta y seis namanùbaca.

El canto de los 144,000

14 ¹Néeseté, péemiacué cayába, nuicáca Cordero ibàlùacawa Sión yàasu dúli íinata. Nàyaca yáapicha ciento cuarenta y cuatro mil namanùbaca wenàiwica catànèeyéi ipùdàlicu Cordero íipidená iyú, Yáaniri Dios íipidená iyú nacái. ²Néese nuémiaca manúiri tàacáisi chènuníiséeri càide iyúwa wéemianá madécaná inanába isàna, càì nacáide iyúwa wéemianá cachàiníiri énu isàna tiríricaalí, càì nacáide iyúwa wéemianá madécaná inuéyéica yàasu arpawa namànicaténá música. ³Yá nacántàaca wàlisài canción yàalubáisi néenibàa, nàacuésemi nacái níái báinúaca cáuyéi ángel, nacuèrinánái yàacuésemi nacái. Canáca áibanái yáaliméeri yéewáidacawa nacántàanápínáquéi canciónca, níawamita ciento cuarenta y cuatro mil namanùbaca èeri mìnánái, Dios iwasèeyéica cháì èeri írìcuíse. ⁴Níacata cà míiyéica iimá inanái yáapicha. Nàacawa Cordero yáapicha àta alénácaalí yàawa. Níacata Dios iwasèeyéica írìpináwa càide iyúwa idàbáanéeri ofrenda èeri mìnánái yèewíise, Cordero írìpiná nacái. ⁵Càmíiyéita cachìwa masacàacáiná náiwitáise.

Los mensajes de los tres ángeles

⁶Néese nuicáca áiba ángel yáalanícawa cáli iwicáubàa machacànita, idènièri cayábéeri tàacáisi cà míiri imáalàawa icàlidacaténáni èeri mìnánái írì, macái cáli néeséeyéi írì nacái, macái yàawiría írì nacái, macái wenàiwica itàaníiyéica áiba tàacáisi iyú, macái wenàiwica íiwitáaná írì nacái. ⁷Yá íimaca cachàiníiri iyú: “Peebáidacué Dios itàcái. Píacué nacái írì cayábéeri, máinícáinácué mawiénica péenáiwaná Dios icàlidacatáipináta èeri mìnánái iináwaná ìwali, yùuwichàidacaténá nía nabáyawaná ìwalíisewa. Iná píacué Dios icàaluíniná, yái idàbéericaté capíraléeri cáli, yái cálica nacái, puìwéeri úni nacái, úni cà míiri puìwa nacái”, càì íimaca.

⁸Néese áiba ángel yàacawa idàbáanéeri ángel yáamiwáise. Yá íimaca: “Idéca imáalàacawa yái manúiri yàcaléca, Babilonia ìyacàlená, idéca imáalàacawa. Babilonia ìyacàlená mìnánáimi náalimáidacaté macái cáli néeséeyéi namàníinápíná náapicha nabáyawanáwa máiní báawéeri”, càì íimaca.

9-10 Néese áiba ángel yàacawa náamiwáise. Yá ímaca cachàiníiri iyú: “Aibacaalí yàaca caluéri cuwèesi icàaluíniná, yéenáiwánási icàaluíniná nacái, áibanáicaalí imàaca natànàaca caluéri cuwèesi ípidená napùdàlicu, nacáapi ìwali áibata, yá Dios yùuwichàidapiná nàawa báawanama máiní báawéeri yùuwichàacáisi iyú. Dios yùuwichàidapiná nàawa quichái ùuléeri béecaná iyú, ípidenéeri azufre, Dios yàasu ángelnái yàacuésemi, Cordero iicápiná nacáíwa. ¹¹ Yái quichái ísalená imichàacawa càiripináta èeri càníiri imáalàawa, yái quichái yùuwichàidéerica nía. Canácatáita nayamáidawa nàuwichàacái íchawa, èeríapi, táiyápi nacái, cawinácaalí yèeyéica caluéri cuwèesi icàaluíniná, yéenáiwánási icàaluíniná nacái, nía nacái imàaquéeyéica natànàaca nàwali caluéri cuwèesi ípidená”, càì ímaca.

¹² Iná iwàwacutácué cachàinica píiwitáise, píacué Dios yàasu wenàiwicaca, píidenìacaténácué piùwichàanàawa matuíbanáiri iyú, píacué yebáidéeyéica càide iyúwa Dios ichùulianá, yebáidéeyéica nacái Jesús itàacái.

¹³ Néese nuémíaca áiba tàacáisi chènuníiséeri. Yá ímaca nulí: “Pitànàa yái tàacáisica: ‘Casíimáica cawinácaalí yéetéeyéipinácawa siùcáisede yebáidéeyéica mamáalàacata Wáiwacali itàacái’, càì pitànàaca”, ímaca yái tàacáisica. Néese Espíritu Santo ímaca: “iBáisícata, casíimáica nía, nayamáidapináwa nàuwichàacái íchawa, yácáiná yái cayábéerica namàníricaté áibanái irí yàapinácawa náapicha!” càì ímaca yái Espíritu Santoca.

La cosecha de la tierra

¹⁴ Néeseté, péemiácué cayába, nuicácaté cabalèeri acalèe. Yá nuicáca abéeri yáawinéericawa acalèe íinata càiride iyúwa asíali iicacánáwa. Idèniaca oroíri corona íiwita ìwaliwa. Idèniaca nacái macàpucuíri wisuanási yéecuacanéeri. ¹⁵ Yá áiba ángel imusúacawa Dios yàasu templo chènuníiséeri íicha, yá imáidaca cachàiníiri iyú irí yái yáawinéericawa acalèe íinata. Imaca irí: “Pisíaca pìasu wisuanási macàpucuíri iyúwa, peedácaténá ituíná iyacáná. Idéca yànàaca yàasu èeri weedácaténáni, míisicáináni, yái ituínásica iyéerica cáli íinata”, càì ímaca. ¹⁶ Néese yái yáawinéericawa acalèe íinata isíaca yàasu macàpucuíri wisuanási iyúwa cáli ìwalibàa, yá yeedáca ituínási cáli íicha.

¹⁷ Néese áiba ángel imusúacawa Dios yàasu templo irícuíse chènuníiséeri, idènièrica nacái macàpucuíri wisuanási yéecuacanéeri. ¹⁸ Yá áiba ángel yàacawa altar íicha, yái ángel icuèerica quichái. Yá

imáidaca cachàiníiri iyú irí yái ángel idènièrica macàpucuíri wisuanási yéecuacanéeri. Yá ímaca irí: “Piwichùa nía piasu wisuanási macàpucuíri iyúwa, peedá uva ìyacaná abéyéeri uva yéetaná íicha ìyéerica cáli íinata, quíiracáiná níái ìyacanáca uvaca”, càì ímaca. ¹⁹Néese ángel iwichùaca nía yàasu macàpucuíri wisuanási iyúwa, yá yeedáca uva ìyacaná cáli íicha. Yá yúucaca uva ìyacaná manuírí yàalusi irìculé napisùacatalépiná uva ituní. Yái yàalusi íimáanáca càicanide iyúwa Dios yàasu yùuwichàacáisi, yùuwichàidacatalépináta báawéeyéi wenàiwica. ²⁰Yá napisùaca uva ìyacaná méetàuculé yàcalé íicha. Yá madécaná iráì imusúacawa yàalusi íicha. Yái iráì yéesáidaca àta caballo yàasu freno néenibàa idepuíwaca. Trescientos namanùbaca kilòmetros idècuni imusúacawa yàalusi íichawa yái iráica.

Los ángeles con las siete últimas calamidades

15 ¹Néeseté nuicáca chènuniré áiba manuírí yéenáiwanási nacáiri icalùadéerica nuicáca: siete namanùbaca ángelnái idènièyéica siete namanùbaca yùuwichàacáisi manuírí. Níacata namáalàidáanáca macáita. Idécanáami siete namanùbaca yùuwichàacáisi yàanàaca èeri mìnánái ìwali, yásí imáalàacawa Dios yàasu yùuwichàacáisi cháì èeri irìcuírca.

²Nuicá nacái càiride iicacánáwa iyúwa manuírí úni asáiri yáaculé càide iyúwa waicáaná vidrio yèewlàdéeriwa quichái yèewi. Nuicáca wenàiwica imawèniadéeyéica caluéri cuwèesi, càmicáiná nàa icàaluíniná, yàasu yéenáiwanási nacái. Càmita nacái namàaca natànàaca nàwali caluéri cuwèesi íipidená yàasu número. Yá nabàlùacawa idùlepi yái manuírí úni asáirica yáaculé, nadènìaca arpa Dios yèerica nalí. ³Yá nacántàaca Moisés yàasu canción, yái Dios yàasu wenàiwica íbaidéericaté Dios irípiná. Nacántàa nacái Cordero yàasu canción. Yái canción íméerica càì:

“íMáiníiri cayábacaca macáita yái pimànírca càmrírica wadé wamànica, pía Wacuèriná Dios, cachàiníiri náicha canánama! Píacata icuèri macáita machacàníiri iyú, báisiiri iyú nacái, pía icuèrica macái cáli néeséeyéi.

⁴Macáita nàapíná píimiétacanáwa, cáalucáiná naicáca pía. Macáita nacái nàapíná pirí cayábéeriwa, pía Wáiwacalica. Píacáiná abéerita mabáyawanéeri. Macái cáli néeséeyéi nàanàapíná pìataléwa, yá nàapínáca picàaluínináwa naicácáiná picùaca macáita machacàníiri iyú”, càì náimaca.

⁵Néeseté nuicáca yàacùacawa yái templo iyéerica chènuniré, yái templo mabáyawanéeri Dios iyéerica irìcu. ⁶Yá siete namanùbaca ángel namusúacawa templo irìcuíse idènièyéica siete namanùbaca yùuwichàacáisi manuíri. Lino yáawamica nabàle masaquèeri mèlumèluíri nacái. Nadènia nacái nàwaliabàawa cácuúri cinturón oroíri nàucutalicubàawa. ⁷Néese abéeri néená níái báinúaca cáuyéi ángel yàaca náalimáwanama abéechúa bacàa yáawami oroíchúata, níái siete ángelca. Níái bacàa ipuniyéiwa Dios yàasu yùuwichàacáisi iyú, yái Dios iyéerica càiripináta, èeri càníri imáalàawa. ⁸Yái templo chènuníiséerica ipuníacawa ísa iyú, imusuéricawa Dios yàatanáise, yái Dios iyéerica icamaláná mèlumèluíri irìcuwa, yái Dios máiníri cachàinica íiwitáise. Yá canáca yáaliméeripiná iwàlùacawa templo irìculé àta namáalàacatalétawa níái siete namanùbaca yùuwichàacáisica siete namanùbaca ángel idènièyéica.

Las copas del castigo

16 ¹Néese nuémíaca cachàiníri tàacáisi templo irìcuíséeri, yái templo iyéerica chènuniré. Yá íimaca nalí níái siete namanùbaca ángelca: “Píacuéwa, picasáaca yùuwichàacáisi cáli íinatalé, yái Dios yàasu yùuwichàacáisi iyéerica siete namanùbaca bacàa irìcu”, càí íimaca nalí.

²Iná idàbáanéeri ángel yàaca icasáaca yàasu bacàa íisawa cáli iwéré. Yá cacháunáca èeri mìnanáí idènièyéica caluéri cuwèesi yéenáiwana napùdàlicu, macái wenàiwica yèeyéica cuwèesi yàasu yéenáiwanási icàaluíniná. Báawéeri cháunási imusúacawa nàwalíise, yásaca imànica nasàni.

³Néese pucháibáaná ángel yàaca icasáaca yàasu bacàa íisawa manuíri úni yáaculé. Yá macáí manuíri úni ichacamàacawa yéetáními íiranámi iyú. Yá macáita néetácawa iyéeyéica manuíri úni yáaculé.

⁴Néese máisibáaná ángel yàaca icasáaca yàasu bacàa íisawa macái inanába yáaculé, macái úni yáaculé nacái, úni imusúcatáiseacawa cáli irìcuíse. Yá nachacamàacawa iráí iyú. ⁵Néese nuémíaca ángel yái icuèrica úni, íimaca Dios irí:

“Pidéca piùwichàidaca nía machacàníri iyú, pía Dios mabáyawanéerica, iyéerica siùcade, iyéerica nacái bàaluité. Cayábacata piùwichàidaca nía.

⁶Nadéca nanúaca pìasu wenàiwica, pìasu profetanái nacái.

Siùca pidéca pìaca nàirapiná iráí. Cayábacata piùwichàidaca

nía càì, néetácáténáwa, nanúacáínáté piasu wenàiwica”,
íimaca.

7 Néese nuémia nacái áiba tàacáisi altar irìcuíséeri, yá íimaca: “íBáísícata, Wacuèriná Dios, cachàíníiri náicha canánama! íPidéca pimànica càide iyúwaté píimáaná! íYácata nabáyawaná iwèni! íPidéca piùwichàidaca nía machacàníiri iyú!” càì íimaca.

8 Néese báinúacáaná ángel yàaca icasáaca yàasu bacàa íisawa èeri ìwali. Yá yèepùacawa máiní ùuléerica yái èeri icamalánáca. Yá èeri icamalánáca yeemáca wenàiwica càide iyúwa quichái yeemáaná wía. 9 Yá wenàiwicanái yeemácawa ùuléeri iyú báawanama, yá nacúisa náichawa Dios báawéeri iyú, yái Dios ibànuèrica nàwali yùuwichàacáisi, càmita nacái nawènúada náíwitáisewa neebáidáanápíná càide iyúwa Dios ichùulianá nía.

10 Néese cinconá ángel yàaca icasáaca yàasu bacàa íisawa caluéri cuwèesi yàalubái íinatalé. Yá catáca èeri, caluéri cuwèesi yàasu cáli icùacataléca wenàiwica. Néese yàasu wenàiwica naamíadaca nanènewa yùuwichàacáisi iyú. 11 Nacúisaca Dios báawéeri iyú, yái Dios chènuníiséerica yùuwichàidacáiná nía cáiwíiri iyú, cháunási iyú nacái. Càmita nacái nawènúada náíwitáisewa nabáyawaná íichawa.

12 Néese seisná ángel yàaca icasáaca yàasu bacàa íisawa manuíri inanába yáaculé íipidenéeri Eufates. Yá chuica yái inanába yéewacáténá nachàbacawa chuiri cáli íinatabàa, níara icuèyéica cáli iyéerica èeri imusúacatáisewa.

13 Néeseté nuicáca máisiba demonio casaquèeyéi íiwitáise. Abéeri demonio imusúacawa màanu inùmalicuise, áiba demonio imusúacawa caluéri cuwèesi inùmalicuise, áiba demonio nacái imusúacawa cachìwéeri iwicùlidéeri inùmalicuise. Níái demonio casaquèeyéi íiwitáise càiyéide iyúwa balùta iicácanáwa. 14 Demoniocáiná nía yáaliméeyéica imànica yái càníirica wenàiwica yáalimá imànica. Néese demonionái nàacawa macái èeri mìnánái icuèrinánái yàatalé, nàwacáidacáténá nacuèrinánái namànínápíná ùwicái Dios íipunita áibaalípiná Dios yàasu èeripíná máiníiri caiyéinináca, yái Dios cachàíníirica náicha canánama.

15 Wáiwacali íimaca walí: “Péemíacué cayába, nùapínacawa néese àniwa isicúasíwata càide iyúwa cayéedéeri yàanàacaalí càmicatáipínáta wenàiwicanái icùa nùanàaca. Casímáica iwàwa cawinácaalí icuèrica nùanàanápíná, íibaidéeri nacái nulípiná àta nùanàacataléta, ipíchaná íbáiniacawa nuwéré ibáyawaná ìwalísewa”, càì íimaca Wáiwacali.

¹⁶Néese demonio casaquèyèica íiwitáise nàwacáidaca macái èeri mìnánái icuèrinánái alé ípidenácataléca Armagedón hebreo itàacái iyú.

¹⁷Néese sietená ángel yàaca icasáaca yàasu bacàa íisawa cáuli irìcubàa. Yá nuémìaca cachàiníiri tàacáisi imusúacawa chènuníiséeri templo irìcuíse yàalubáisi yèewíise. Yá íimaca: “íYácata imanùbaca!” càì íimaca. ¹⁸Néese énu icànaca mèlumèluíri iyú, nuémìa nacái manùba tàacáisi, casànaca nacái énu madécaná. Yá cáli icusúaca nacáiwa máiní cachàiníiri iyú, máiní cachàiníiri náicha macái cáli icusúacái waiquéerica cháì èeri irìcu. ¹⁹Néese manuíri yàcalé iseríaca yèewiwa máisibawaca, cálicáiná yàacùacawa cáli icusúacái iyú. Yá namáalàacawa níái yàcaléca macái cáli íinatéyèica iyaca. Néese Dios iwàwalica manuíri yàcalé Babilonia, yùuwichàidacaténáni manuísíwata. ²⁰Macái iwàwata nasawíacawa manuíri úni yáaculé. Manuínaméyèí dúli nacái namáalàacawa canánama. ²¹Granizo yúuwàa nacáiwa chènuníise wenàiwica ìwali, yái granizo manuínaméyèí íba nacáiyèí cuarenta namanùbaca kilonaméeri cawàwaná ímíaca, àta wenàiwicanái icuísacataléta íichawa Dios báawéeri iyú, ìwalíise yái yùuwichàacáisica granizo yúuwèericawa nàwali, máinícáiná báawacani.

Condención de la gran prostituta

17 ¹Néeseté nuicáca abéeri néená níái siete namanùbaca ángel idènièyèica siete namanùbaca bacàa. Yá íimaca nulí: “Aquialé, núsáidaca piicá yùuwichàacáisi yànèeripiná ùwali úái íiméechúaca manùbéeyèí asianái yáapicha plata ìwalínápiná yáawinéechúacawa manùbéeyèí úni inànìacubàa. ²Macái cáli icuèrinánái cháì èeri irìcuíyèica nadéca naimáca úapicha nàacawéeyèí íichawa. Nía nacái èeri mìnánái nadéca nacàmaca ùasu ìiracalési ipuúri iyú, umàaquéerica nalí naimácaténá úapicha”, íimaca nulí.

³Néese yái ángel itéca núa manacúali yùuculé, càinàwàiri, canácatalé wenàiwica. Yá nuicáca inanái yáawinéechúawa quíiréeri cuwèesi íinata. Cuwèesi ípidená madécaná ichanàacawa cuwèesi ìwalíise, yái ípidená íiméerica “Dioscata núa”. Idèniaca siete namanùbaca íiwitawa, diez nacái namanùbaca ichàle. ⁴Uái inanáica udèniaca ubàlewa capíralesíwéeri íicacánawa, quíiréeri nacái. Udèniaca nacái madécaná tùliquìchi, oroíri, cawèníchúa íba nacái, cawèníchúa perla nacái. Udèniaca nacái bacàa ucáapirìcuwa, abéechúa bacàa oro yáawamíchúa ipuniéechúawa iyú ubáyawaná umànírira manuísíwata Dios íiquéerica máiní báawéeri iyú, yái uimáanáca manùbéeyèí

yáapicha casaquèeri iyú ùacaténá cuwáinái yéenáiwaná icàaluíniná, níái ídoloca. ⁵Udènià úpídenáwa ibàacanáta upùdàlicuwa: “Manuíri Babilonia ìyacàlená, úái náatúaca macái inanái iiméeyéica aslanái yáapicha plata ìwalínápiná, náatúa nacái macái èeri mìnanáica imàníiyéica ibáyawanáwa nàacaténá cuwáinái icàaluíniná, níái ídoloca”, càì fímáanáca yái úpídenáca. ⁶Yáté nuicáca ucámaca úái inanáica uìracáiná náiranámi, níái Dios yàasu wenàiwicamica, náiranámi nacái níái nanuéyéica neebáidacáiná Jesús itàacái. Nudécanáami nuicáca úa, yá máiní nuínáidacawa manuísíwata nuicáidaca ulí, càmicáináté núalíawa càinácaalí iimáaná yái yéenáiwanási nacáirica.

⁷Néese ángel fímaca nulí: “¿Cáná yéewa máiní cáulenáca píichani? Yáca numàacapíná píalíacawéera càinácaalí fímáaná, úái inanáica, càinácaalí fímáaná nacái yái caluéri cuwèesi itéerica úa, idènièrica siete namanùbaca íiwitawa, diez namanùbaca nacái ichàle. ⁸Yái caluéri cuwèesi piiquéerica ìyacaté, quéwa cà míiri ìya siùca. Néese imusúapínáwa depuíféeri utàwi irìcuíse, néesezáwa imáalàapínáwa. Eeri mìnanáí yàapíná caluéri cuwèesi icàaluínináwa, macáita canéeyéica ípídená ichanàacawa cuyàluta irìcu èeri ipíchawáiseté, yái cuyàluta idènièrica náipídená macái wenàiwicaca Dios yèeyéica icáuca cà míiri imáalàawa. Quéwa èeri mìnanáí máiníiripíná cayábaca naicáca yái caluéri cuwèesi ìyéerica bàaluité, néese yéetácatéwa, quéwa yèepuèripínáwa cáuca àniwa.

⁹“Siùcade péemíacué cayába, píacué cáalíacáiyéica, píalíacaténácuéwa càinácaalí fímáaná: Níái siete namanùbaca íiwitaca fímáanáca càicanide iyúwa siete namanùbaca dúli, inanái yáawinéechúacawa íinata. ¹⁰Íimáanáca càicanide iyúwa nacái siete namanùbaca nacuèrinánái icuèyéica wenàiwica néenibàa. Cinco namanùbaca nacuèrinánái nadéca nacaláacawa, yá nadéca néetáacawa. Abéeri néená icùaca wenàiwica siùca. Aiba yàanàapínáwa icùacaténá wenàiwica. Quéwa yàanàapínácaalí, yá icùapíná wenàiwica maléená èeri. ¹¹Yái caluéri cuwèesica ìyaca bàaluité, néese yéetácatéwa, yácata ochonáca nacuèrinásàiri, quéwa abéeri néenácani, níái siete namanùbacaca, yá nacái imáalàapínáwa.

¹²“Níái diez namanùbaca ichàle piiquéeyéica fímáanáca càicanide iyúwa diez namanùbaca nacuèrinánái cà míiyéicáwa idàba icùaca wenàiwica. Quéwa nacùapíná níawa maléená èeriwa yáapicha yái caluéri cuwèesica. ¹³Yá abédanamata náiwitáise níái diez namanùbaca nacuèrinánái náibaidáanápiná caluéri cuwèesi irí, namànicaténá

càide iyúwa iwàwáaná, namàcáanápíná nacái caluéri cuwèesi icùaca nàasu cáli néeséeyéi. ¹⁴Yá namànipíná ùwicái Cordero ípunitawa quéwa Cordero imawèniadapíná níawa, cachàiníricáináni náicha canánama èeri mìnánái icuèrinánáica. Níacáiná nacái Cordero yáapichéeyéica, Cordero idéca imáidaca nía, idéca nacái yeedáca nía yàasu wenàiwicapínáwa, nadéca nacái neebáidaca itàacái éwita nàuwichàacáanítawa”, càì ímaca nulí yái ángelca.

¹⁵Yái ángel ímaca nulí àniwa: “Pidéca piicáca úái iiméechúaca manùbéeyéi asianái yáapicha plata ìwalinápíná, yáawinéechúawa manuínaméeyéi úni inàniacubàa. Níái manuínaméeyéi úni ímáanáca càicanide iyúwa macái íiwitáaná wenàiwica namanùbaca, macái cáli néeséeyéi nacái, macái wenàiwica itàaníyeyéica áiba tàacáisi iyú nacái cháí èeri irìcuíyeyéica. ¹⁶Níái diez namanùbaca ichàle piiquéeyéica, ímáanáca càicanide iyúwa nacuèrinánái ìyeyéica caluéri cuwèesi yáapicha. Máiní báawaca naicápíná úái iiméechúaca asianái yáapicha plata ìwalinápíná. Yá náucaca úa abéechúata, mabàleta. Néese nayáapíná uinámi, yá neemápiná uchécami quichái iyú. ¹⁷Dioscáiná idéca imàacaca náináidacawa namànínapíná càide iyúwa iwàwáaná namànica, íná níái diez namanùbaca icuèyeyéica cáliquéi, abédanamapínáta náiwitáise náapichawáaca neebáidáanápíná caluéri cuwèesi itàacái, namàcáanápíná nacái icùaca nàasu cáli néeséeyéi, àta ichàbacatalétawa macáita càide iyúwa Dios icàlidáanáté. ¹⁸Uái inanái piiquéechúaca, yácata manuírì yàcaléca ichùulìerica macái cáli icuèrinánái”, càì ímaca nulí yái ángelca.

La caída de Babilonia

18 ¹Néeseté àniwa nuicáca áiba ángel iricùacawa chènuníise. Yá cachàinírìca íiwitáise. Cáli icànaca iyú yái ángel icamaláná cayábéerica. ²Yá ímaca máiní cachàinírì iyú:

“Ídéca imáalàacawa yái manuírì yàcalémica Babilonia ìyacàlená, idéca imáalàacawa! ¡Yá demonionái ìyaca néenibàa! ¡Macái íiwitáaná báawéeyéi demonio icùacani yái yàcalémica! ¡Macái íiwitáaná báawéeyéi màsibèe, casaquèeyéi cuipìra nacái nadéca namànica nabànwawa néenibàa, namùlubè nacáiwa!

³Níacáiná macái èeri mìnánái nadéca nacàmaca ùasu ìiracalési ipuírì iyú, imàaquéechúaca yáawawa nalí naimácaténá úapicha. Níái icuèyeyéica cáli canánama cháí èeri irìcuíyeyéica

nadéca naimáca úapicha, úái càmfíchúaca náinusíwa. Nía nacái cacharreroca cháí èeri iricuíyéica nadéca càasuca nía úapicha, ùyacáiná máiní càasuíri iyú umànicaténá ubáyawanáwa máaléquéeri iyú”, càì íimaca.

4 Néese nuémíaca áiba tàacáisi chènuníseeri. Yá íimaca:

“Pimusúacuéwa yàcalé íicha, píacué cáininéeyéica nuicáca, ipíchanácué pimànica pibáyawanáwa úapicha, ipíchanácué nacái nùuwichàidaca pía úapicha.

5 Máinicáiná manuírca ubáyawaná, íná iwàwacutá Dios yùuwichàidaca úa. Dios yáalíacawa ìwali, yái ubáyawanáca.

6 Piùwichàida úa ìwalíse yái báawéerica umànírca áibanái írí, yá piùwichàida úa cachàiníri iyú pucháiba yàawiriéicatái yáwanái íicha yái báawéerica umànírca áibanái írí.

7 Càide iyúwa cachàiníiná uicáca úawawa, uedáaná nacái ulíwa macái cawèníri, càita nacái piùwichàida úa, pimàaca uícháaníca. Uumacáiná uwàwalicuísewa: ‘Núacata icuèchúaca macái wenàiwica. Canácatáita nuícháaníwa càide iyúwa maníríchúami íicháaníiná’, úumaca uínáidacawa ulíwa.

8 Iná yéewa abé èeri iricu yàanàapíná ùwali yái ùuwichàanápínacawa, yásí uícháanícawa umáapicawa, yá uetápiná nacáiwa. Néese uemápinacawa quichái iyú macáita, cachàinicáiná Wacuèriná Dios íiwitáise, yái yùuwichàidéeripínaca úa”, íimaca.

9 Néese níái icuèyéica cáliquéi, íiméeyéica úapicha càmfíchúaca náinusíwa, níái iyéeyéicaté càasuíri iyú úapicha, yá náicháanípiná cáiwíri iyú ùwali, naicáciná uemámicawa. 10 Yá nabàlùapínacawa déeculé úicha, cáalucáiná naicáca ùuwichàanacawa. Yá náimaca nalíwáaca:

“íCatúulécanáca waicáca pía, pía yàcalé manuírca Babilonia, yái yàcaléca cachàinírímica! Aquialénamata abé hora iricu, Dios idéca yùuwichàidaca pía”, càipíná náimaca.

11 Nía nacái cacharreroca cháí èeri iricuíyéica, náicháanípiná nacái ùwali. Yá máiní achúmaca nawàwa nacái càmicáiná quirínama wenàiwica iwènìa náicha nàasu natéerica. 12 Natécaté néré oro, quírameníri plata nacái, cawèníyéi íba nacái, perla nacái, cayábéeri wáluma lino nacái, wáluma capíralesíwéeri íicacánáwa nacái, wáluma seda nacái, quíréeri nacái, macái íiwitáaná àicu pumèníri isàni nacái,

macái wawàsi nacái namànírica marfil imànicaná, macái wawàsi nacái namànírica cawèníiri àicu imànicaná, bronce imànicaná nacái, hierro imànicaná nacái, cawèníiri íba mármol imànicaná nacái. ¹³Natécaté nacái canela, casàníiri nacái, incienso pumèníiri isàni nacái, pumèníiri mirra nacái, perfume nacái, uva ituní ipuírí nacái, séenási nacái, cayábéeri harina nacái, trigo ituíná nacái. Natécaté nawéndacaténá nacái napìranáíwa pacá, oveja nacái, caballo nacái, carro nacái, wenàiwicanái nacái nawéndacaténá nía yàcalé mìnanáí irí. ¹⁴Cacharrerónái náimapiná yàcalé irí:

“iCanáca pírí ìyacanási cawèníirica, caséericaté piyáaca! iIdéca yúucacawa píicha càiripináta pìasu cawèníiri yàcàsica, macái pìasu cayábéeri wáluma nacái! iCanácatáita pìanàa nía àniwa!” náimaca.

¹⁵Níái iwéndéeyéicaté càiri wawàsi yàcalé mìnanáí irí, yeedéeyéicaté nacái nalíwa plata yàcalé mìnanáí íicha, nabàlùapináwa déeculé yàcalémi íicha, cáalucáiná naicáca yàcalémi yùuwichàanáwa. Yá náicháanípíná cachàiníiri iyú, máini achúmaca nawàwa. ¹⁶Yá náimapiná nalíwáaca:

“iCatúulécanáca waicáca yái manuírí yàcalémica! Yàcalé mìnanáimi nadènàcaté nabàlewa cayábéeri lino, wáluma capìralesíwéeri iicácanáwa nacái, quíiréeri nacái. Cachìlanáca nía nacái oro iyú, cawèníiri íba iyú nacái, perla iyú nacái.

¹⁷IYá abéerìcuíseta, abéeri minuto irìcu, idéca imáalàacawa macáita nàasumi cawèníirica!” náimaca.

Macáita idènièyéica nave lancha nacáiri, nía nacái cacharreroca yèeyéicawa nave irìcu, nía nacái íibaidéeyéica nave irìcu, yèeyéicawa manuírí úni yáacubàa, nabàlùapináwa déeculé yàcalémi íicha.

¹⁸Naicápiná yàcalémi íisalená imichàacawa yàcalémi íicha, yásí náimaca náicháaníca cachàiníiri iyú: “iCanácata áiba manuírí yàcalé càide iyúwa yái yàcalé cayábéeriquéi!” náimaca. ¹⁹Yá namutúapíná cáli ichùmalé náiwita íinatabàawa, càide iyúwa náiwitáise iyáaná máinícáiná achúmaca nawàwa. Yá náicháanípínáca cachàiníiri nasàna iyúwa. Yá náima:

“iCatúulécanáca waicáca yái yàcalé manuírìmica! Yàcalé yàasu cawèníirimi iyú nadéca càasuca namànica níawawa, níái idènièyéica yàasu navewa lancha nacáiri manuírí úni yáacubàa. Aquialénamata abéeri hora irìcu idéca imáalàacawa macái yái yàcalémica”, náimaca.

20 Quéwa casímáicué piwàwa yàcalémi ìwali, píacué iyéeyéica chènuniré, píacué nacái Dios yàasu wenàiwicaca, píacué nacái apóstolca, píacué nacái profetaca, icàlidéeyéica tàacáisi Dios inùmalìcuíse. Casímáicué piwàwa Dioscáiná idéca yùuwichàidaca yái yàcalémica ìwalíise macáita yái báawéerica umàníricatécué pirí.

21 Néese nuicáca áiba cachàníiri ángel imichàidaca manuírí íba macàpucuírí. Yá manuíca yái íbaca càide iyúwa manuírí íba nàulùanápíná iyú trigo ituíná. Néese ángel yúucaca yái manuírí íbaca manuírí úní yáaculé. Yá ìimaca:

“Càita nacái piúcapinácawa, pimáalàacawa ráunamáita, píca yàcalé manuíríca Babilonia iyacàlená. Yá canáca náalimáaná nèepùa nàanàaca píca àniwa.

22 Càmita nacái néemiàpiná nasàna pìasu calle iricubàa, níái inuéyéica sànasi arpa iyú, nía nacái icántèyeyéica, nía nacái ipùlièyeyéica íwa, trompeta nacái. Canáca nacái íbaidéeyéi néenibàa canácáiná náibaidéeripiná. Càmita nacái nàulùapíná ituínási.

23 Càmita napucúadapíná lámpara néenibàawa. Càmita nacái namànipíná matrimonio, máinicáináaté cachàiniíri naicáca níawawa níái yàcalémi yàasu cacharreroca, nía nacái yàcalé mìnánáimi naméeràidacaté canánama èeri mìnánái Dios íicha nàasu màliacáisi iyúwa.

24 Nanúacaté Dios yàasunái profetamica icàlidéeyéicaté tàacáisi Dios inùmalìcuíse, nía nacái Dios yàasu wenàiwicamica, nía nacái canánama nanuéyéicaté neebáidacáiná Dios itàacái, cháí èeri irìcu”, ìimaca yái ángelca.

19 1 Néeseté àniwa nuémíaca cachàiniíri tàacáisi nacáiri, càide iyúwa wéemianá manùbéeyéi wenàiwica itàacái iyéeyéica chènuniré. Yá náimaca cachàiniíri iyú:

“iAleluya! Wàacué Wacuèriná Dios iríwa cayábéeri Dioscáiná idéca iwasàaca wía yàasu yùuwichàacáisi íchawa, wàacué icàaluíniná, máini cachàiniíri íiwitáise Wacuèriná Diosca.

2 Yácáiná Dios yùuwichàidaca báawéeyéi wenàiwica machacàniíri iyú. Idéca yùuwichàidaca úái inanái ìiméechúacaté asianái yáapicha plata ìwalínápiná, úái iwènùadéechúacaté macái èeri mìnánái íiwitáise namànicaténá báawéeri naimácáináaté úapicha càmfíchúaca

náinusíwa. Dios idéca imáalàidaca úa unúacáináté wenàiwica íbaidéeyéica Dios irípiná”, náimaca.

³Néese náimaca àniwa:

“iAleluya! Wàacué Dios irí cayábéeri. Yái uísalená imichàacawa càiripináta, èeri càmiiri imáalàawa”, náimaca.

⁴Néese níái veinticuatro namanùbaca nacuèrinánáica, nía nacái báinúaca cáuyéi ángel náuwàa naliacawa nanùmáawawa Dios ípunita nàacaténá icàaluíniná, yái yáawinéericawa yàalubái íinatawa. Yá náimaca: “iBáisíta, amén! iAleluya, wàacué Dios irí cayábéeri!” náimaca.

⁵Néese nuémìaca cachàiniiri tàacáisi yàalubáisi néeséeri. Yá íimaca: “iPiacué irí cayábéeri, yái Wacuèriná Diosca, macáitacué pía íbaidéeyéica irípiná, piacué nacái yèeyéica Dios icàaluíniná, piacué sùmanái, béeyéi nacái canánama!” càì íimaca.

La fiesta de las bodas del Cordero

⁶Néese nuémìaca nacái áiba tàacáisi nacáiri càide iyúwa wéemianá madécaná wenàiwica imáidáaná, càide iyúwa nacái wéemianá manùbéeri màladàca isàna, càide iyúwa nacái wéemianá casànéeyéi énu manuýéi tirícaalí. Yá náimaca:

“iAleluya, wàacué cayábéeri Wacuèriná Dios cachàiniiri iríwa, yái cachàiniirica náicha canánama, idàbacáiná icùaca macáita!

⁷Yá casíimáicué wía, wayanídacuéwa manuísíwata. Wàacué Dios irí cayábéeri. Idéca Cordero yéenaiwaná yàanàaca yeedácatáipináta iríwa yàacawéetúapináwa. Uái yàacawéetúapiná udéca uchùnìaca úawawa.

⁸Idéca imàacaca ùwalica ubàlewa cayábéeri lino, masaquèeri nacái, mèlumèluíri nacái. Yái cayábéeri wáluma lino ímáanáca càicanide iyúwa yái cayábéerica Dios yàasu wenàiwicanái imàníirica”, càì náimaca.

⁹Néese ángel íimaca nulí: “Pitànàani: ‘Casíimáica níái wenàiwicaca Dios imáidéeyéica Cordero yàasu matrimonio nérépiná, yeedápinácaalí iríwa yàacawéetúapináwa’, càì pitànàacani”, íimaca nulí. Néese íimaca nulí àniwa: “Yái tàacáisi nucàlidéerica pirí, báisíiri tàacáisicani Dios inùmaliçuíséerica”, íimaca nulí.

¹⁰Yá nubàlùacawa nùlulù ipùata iyúwa ángel irí nùacaténá icàaluíniná, quéwa ángel íimaca nulí: “Picá pimàni càì. Núacata íbaidéeri Dios irípiná càide iyúwa pía, nía nacái péenánái icàlidéeyéica mamáalàacata

naináwaná ìwaliwa Jesús yàasunáica nía. Pìa Dios icàaluíniná”, ìimaca nulí. Yácáiná Espíritu Santo imàaquéericaté profetanái icàlidaca tàacáisi Dios inùmalicufise, yácata Espíritu imàaquéerica Jesús yàasu wenàiwica icàlidaca iináwaná ìwali.

El jinete del caballo blanco

¹¹Néeseté nuicáca capíraléeri cáli yàacùacanéerica chènuníise, Dios ìyacàle nacái, yá péemiacué cayába, nuicáca cabalèeri caballo. Yái wenàiwica yáawinéericawa caballo ìinata, yácata Wáiwacali, ìpídenéeri Cayábéeri ìiwitáise, Machìwéeri nacái. Machacàníiri iyú yùuwichàidaca báawéeyéi wenàiwica, imànica nacái náipunita ùwicái. ¹²Yá mèlumèluíri ituí càide iyúwa waicáaná quichái ipèrua. Idènìaca madécaná corona ìiwita ìwaliwa. Idènìaca ìpídenáwa ìwaliwa, quéwa abéerita Wáiwacali yáalíawa càinácaalí ìimáaná yái ìpídenáca. ¹³Wáiwacali ináawani idéca yáapúacawa iráí yáaculé, yá idènìaca ìpídenáwa, Dios itàacái. ¹⁴Chènuníiseyéyi úwi nàacawa yáamiwáise. Nadènìaca nabàlewa cayábéeri wáluma lino cabalèeri, masaquèeri nacái. Nàacawa náalimáwanama cabalèeri caballo ìinata. ¹⁵Wáiwacali yùuwichàidapíná èeri mìnanáí itàacái cachàíníri iyúwa, macái cáli néeseéeyéi càmiíyéica yeebáida itàacái. Yùuwichàidapíná níawa cachàíníri iyú. Yá imáalàidapíná wenàiwica imàníyéica ibáyawanáwa máiníri báawaca Dios iicáca, yái Dios cachàíníríca náicha canánama. Imáalàidapíná níawa càide iyúwa wenàiwica ibawàidacaalí uva ìyacaná ipisùacaténá uva ituní. ¹⁶Idènìaca ìpídenáwa ináawani ìwaliwa, icuuchuí ìwaliwa nacái: “Nacuèrinásàiri, níái macái cáli icuèrinánáica. Náiwacali nacái níái macái èeri mìnanáí ìiwacanánáica”.

¹⁷⁻¹⁸Néese nuicáca áiba ángel ibàluèericawa èeri ituí irìcu. Yá ìimaca cachàíníri iyú wáchulinái irí yáalaníyéicawa chènunibàa: “Caquialécué, pìwacáidáyacacuéwa piyáacaténácué piyáacaléwa cadénama yái yàcàsi Dios ichùnièripínácué pírí. Piyáacaténácué piyáacaléwa nainámi níái ichùulièyéicaté wenàiwica, nía nacái úwi ìiwacanánáimica, nía nacái wenàiwicanáimi cachàíníyéica, nía nacái caballomica, nía nacái yèeyéimicawa caballomi ìinata, nía nacái macái wenàiwicamica, nía nacái ìibaidéeyéimica mawèníri iyú áibanái irí, nía nacái yèepuníyéimicawa máiwacalíyéimica, nía nacái sùmanáimica, béeyéimica nacái”, càì ìimaca yái ángelca wáchulinái irí.

¹⁹Néese nuicáca yái caluéri cuwèesi, nía nacái ichùulièyéica èeri mìnanáí. Nuicá nacái náapicha nàasu úwinái ìwacáidáyaquéeyéicawa

namànicaténá ùwicái Wáiwacali ípunita yái yáawinéericawa cabalèeri caballo ínata, náipunita nacái yàasu úwinái yèeyéicawa yáapicha chènuniise. ²⁰Yá náibàaca caluéri cuwèesi. Náibàaca nacái cachìwéeri iwicùlidéerica, imàníirica yái càmfírica wenàiwica idé imànica idècunitàacá ìyaca caluéri cuwèesi yáapicha, ichìwáidacaténá wenàiwica imàaquéeyéica nachanàidaca caluéri cuwèesi ípidená nàwali, nía nacái yèeyéica cuwèesi yéenáiwaná icàaluíniná. Yá náucaca caluéri cuwèesi quichái irìculé icáuca yáapichatawa, yàasu cachìwéeri iwicùlidéeri yáapichawa manuíri quichái irìculé, yáara manuíri yàawa nacáirica ipucuéricawa mamáalàacata cachàiníri azufre iyú, càiripinéerita ìyaca. ²¹Néese yái Wáiwacali yáawinéericawa caballo ínata inúaca cuwèesi yàasu úwináimi macáita. Inúaca nía itàacái iyúwa imusuéricawa inùmaliçuise. Yá macáita wáchuli nayáaca nayáacaléwa cadénama úwinái ichéecami yéetéeyéimicawa àta cadécataléta níái wáchulica.

Los mil años

20 ¹Néeseté nuicáca ángel iricùacawa chènuniise. Idèniaca llave icáapi irìcuwa yàacuèripiná iyú depuífwéeri utàwi inùma. Idènia nacái manuíri cadena icáapi irìcuwa. ²Néese ángel íbàaca màanu, yái bàaluitéeri àapica, idènièrica ípidenáwa cà: Diablo, ímáanáca “Icháwàidéeri waináwaná ìwali”, Satanás nacái, ímáanáca “Wàuwidesàiri”. Ángel idacùaca màanu cadena iyú mil camuí piná. ³Néese ángel yúucaca màanu depuífwéeri utàwi irìculé. Yá ángel ibàliaca utàwi inùma. Ibàliaca utàwi inùma cachàiníri iyú màanu iwicáu àta imáalàacatalétawa yái mil camuíca, ipíchaná màanu ichìwáidaca èeri mìnaná. Néese mil camuí idénáami, yá iwàwacutápiná nawasàaca màanu àniwa maléená èeripináta.

⁴Néese nuicáca madécaná yàalubáisi. Níái yáawinéeyéicawa yàalubáisi ínata nacùapiná wenàiwica nàuwichàidacaténá cawinácaalí imàníiyéica ibáyawanáwa. Nuicá nacái wenàiwica yéetéeyéimicawa nawichuèyéicaté íicha íiwita nacàlidacáinaté Jesús iináwaná ìwali, nacàlidaca nacái Dios itàacái áibanái irí. Càmfíyéicaté yàa caluéri cuwèesi icàaluíniná, yàasu yéenáiwánási nacái. Càmitaté namàaca áibanái nachanàidaca caluéri cuwèesi ípidená napùdàlicu, nacáapi ìwali áiba. Yá nèepùapináwa cáuca àniwa, yá nacùapiná wenàiwicanái Cristo yáapicha mil camuípiná. ⁵⁻⁶Yácata idàbáanéeri namichàanácawa. Casímáica nía, mabáyawanéeyéica nía nacái, níái imichèeyéipínacawa yéetácáisi íicha idàbáanéerica namichàanácawa. Yá machànica náicha

yáara pucháibáaná yéetácáisica. Sacerdotepináca níawa íbaidéeyéica Dios irípiná, Cristo irí nacái. Yá nacùapiná wenàiwicanái Cristo yáapicha mil camuípiná. Quéwa áibanái yéetéeyéimicawa càmitàacá namichàapináwa yéetácáisi íicha àta imáalàacatalétawa yái mil camuíca.

Derrota del diablo

⁷Néese mil camuí idénáami, yásí ángelnái namusúadapiná Satanás irìcuíse yái nadacùacatalécani. ⁸Yá imusúapináwa ichìwáidacaténá macái èeri mìnaná, nía nacái ípidenéeyéica Gog, Magog nacái. Yá ìwacáidapiná nía namànicaténá ùwicái. Chínamáipináca níái úwica càide iyúwa càina ituíná.

⁹Yá nàapináwa namanùbaca iyúwa chínamáinama níái úwica, Israel yàasu cáli ínatalé, yá nabàlùapináwa itéesebàa yái Dios yàasu wenàiwica ìyacàleca, yái yàcalé cáininéerica Dios iicáca. Néeseta quéwa Dios ibànùapiná quichái chènuniíse, yásí yeemáca macáita níái úwináimica. ¹⁰Néese Diablo, yái Satanás icháwàidéerica waináwaná ìwali, yái ichìwáidéerica wenàiwica, Dios yúucapínani quichái irìculé, yáara manuírì yàawa nacáirica ipucuéricawa ìyaca mamáalàacata cachàiníiri azufre iyú, alé ìyacatalépináca yái caluéri cuwèesica, yá nacái yàasu cachìwéeri iwicùlidéerica. Yá nàuwichàapináwa càiripináta èeripinama, táiyápinama nacái, èeri càníiri imáalàawa.

El juicio ante el gran trono blanco

¹¹Néeseté nuicáca manuírì yàalubáisi cabalèeri. Nuicá nacái yái yáawinéericawa yàalubáisi íinata. Yá cáliquéi, yá nacái capìraléeri cáli chènuniíiséerica nachalíacawa, yá canáca nía quirínama, Dios imáalàidacáiná nía, yái Dios yáawinéericawa yàalubáisi íinata. ¹²Néese nuicá níái yéetéeyéimicawa canánama, níái manuínaméeyéica, nía nacái púubéeyéica. Yá nabàlùacawa yàalubáisi íipunita. Néese cuyàluta nàacùacawa. Yàacùacawa nacái áiba cuyàluta idènièrica wenàiwicanái ípidená idènièyéica icáucawa càníiri imáalàawa. Néese icàlidaca naináwaná ìwali níái yéetéeyéimicawa, càide iyúwa naléena cuyàluta irìcuíse naináwaná, càinácaalíté namàníná idècunitàacá cáuca nía. ¹³Macái wenàiwica yéetéeyéicatéwa manuírì úni yáaculé namusúacawa úni yáacuíse, yá nabàlùacawa Dios íipunita. Macáita nacái yéetéeyéimiwa nàanàaca yéetácáisi íicha, càliculli íicha nacái, síisáanácaalíté néetácawa. Yá icàlidapiná naináwaná ìwali canánama càinácaalíté namàníná idècunitàacá cáuca nía. ¹⁴Néese yúucaca

yéetácáisi quichái iriculé; yúucaca infierno quichái iriculé nacái, yái infierno báawéeyéimi íiwitáise yúuwichàacatalécawa. Yúucaca nía quichái iriculé, yái manuíri yàawa nacáirica ipucuéricawa iyaca mamáalàacata quichái iyú. Yácata pucháibáaná yéetácáisica, yái manuíri yàawa nacáirica ipucuéricawa quichái iyú càiripinéerita iyaca. ¹⁵Yá macáita wenàiwica canéeyéica ípidená ichanàacawa cuyàluta iricu, yásí yúucaca nía quichái iriculé, yái manuíri yàawa nacáirica ipucuéricawa mamáalàacata quichái iyú, canácáiná náipidená cuyàluta iricu, yái cuyàluta idènièrica wenàiwicanái ípidená idènièyéica icáucawa cà míiri imáalàawa.

El cielo nuevo y la tierra nueva

21 ¹Néeseté, núa Juan, nuicáca wàlisài capiráléeri cáli, nuicá nacái wàlisài cháí cáli, imáalàapinácáináwa yáara idàbánéerimica capiráléeri cálica, cháí idàbánéerimica cálica nacái. Canácata quéwa manuíri úni. ²Néese nuicáca mabáyawanéeri yàcalé, yái wàlisài Jerusalénca. Iricùacawa chènuníise Dios yàatanáise. Cayábéerica yái yàcaléca Dios ichùnìèrica cayába. Cayábéeri iicacánáwa càiride iyúwa inanái iicacánáwa udécánáami ùwalica ubàle cawèníriwa ùacawéeri irípináwa, ipíchawáise umànica matrimonio yáapicha. ³⁻⁴Néeseté nuèmiàca cachàiníiri tàacáisi Dios yàalubái iricuíséeri, yái yàalubáisi Dios yáawinacatáicawa, icùacaténá canánama. Yá càí íimaca: “Péemìa cayábani, siúcáisede Dios iyaca èeri mìnanáí yáapicha. Yèepunípináwa náapicha, icùapiná nacái níawa. Dioscata yàacawéeridapiná nía, Nacuèrinápiná nacáicani. Dios itunúapiná náicha natuíyáa macáita. Canáca yéetácáisi néré. Cà míiyéipiná fícháaní néenibàa. Càmita achúma nawàwa. Canáca cáiwíiri yácáiná idéca imáalàacawa càiripináta canánama yáara quéechéerimicaté iyaca”, íimaca nulí.

⁵Néese Dios, yái yáawinéericawa manuíri yàalubáisi íinata, icùacaténá canánama, íimaca: “Péemìa cayába, numànica nùyaca macáita wàlisàita àniwa”, íimaca. Néese íima nulí àniwa: “Pitànàacani, càide iyúwa núumáaná píri, báisiiricáiná nutàacáica íná píalimá peebáidacani”, íimaca nulí yái Diosca.

⁶Yá íimaca nulí nutànàacaténá tàacáisi: “Nudéca numáalàidaca numànicani. Núacata yái iyéericaté èeri ipíchawáiseté, núacata nacái yái namáalàidáaná canánama càide iyúwa las letras alfa y omega. Cawinácaalí macàléerica iwàwa, nùaca ìirawa úni yèeri icáuca cà míiri imáalàawa,

mawènfiri iyú quéwa nùaca ìirani”, ìimaca nulí nutànàacaténani. ⁷Yá ìimaca nulí àniwa yái Diosca: “Cawinácaalí imawèniadéeyéica báawéeri, nùaca nalí macáita yái cawènfirica mawènfiri iyú, níái nuénibeca. Núacata nacuèrinápináwa. Níacata nuénibepiná nacáíwa”, ìimaca nulí nutànàacaténani. ⁸Néese ìimaca nulí àniwa yái Diosca: “Quéwa cawinácaalí níái càmfíyéica yeebáida nutàacái cáalucáiná nàuwichàacawa nulípiná, níá nacái iwènúadéeyéica nuícha íiwitáisewa, níá nacái càmfíyéica yeebáida nutàacái, níá nacái casaquèeyéica íiwitáise, níá nacái inuéyéica wenàiwica meedá, níá nacái iiméeyéica áiba yáapicha càmfíchúaca náinusíwa, càmfíirica nacái nanìrisíwa, níá nacái camàliquèeyéica, níá nacái yèeyéica ídolo cuwáiná yéenáiwaná icàaluíniná, níá nacái macáita cachìwéeyéica, iwàwacutápiná nàacawa manuíri quichái iriculé yái manuíri yàawa nacáirica ipucuéricawa mamáalàacata azufre iyú, máiníri ùuleca, càiripinéerita iyaca. Yái quichái íipidenéeri ‘Pucháiba yàawiriéri yéetácáisica’ ”, ìimaca nulí yái Diosca.

La nueva Jerusalén

⁹Néeseté áiba ángel yàanàaca nùatalé, abéeri néená níái siete namanùbaca ángelca idènièyéicaté siete namanùbaca bacàa ipuniéyécawa iyú yái siete namanùbaca yùuwichàacáisi Dios ibànuèripináca namáalàidáaná canánama yùuwichàacáisica cháí èeri iricúirica. Yái ángel ìimaca nulí: “Aquialé, núsáidacaténá piicá úara Cordero yàacawéetúapináca”, ìimaca nulí yái ángelca. ¹⁰Néese Espíritu Santo imàacaca nuicáca ángel itéca núa, yéenáiwanási nacáiri iyúta quéwa, alé chènuníri dúli íinatalé. Néese ángel yáasáida nuicáca Cordero yàacawéetúa, yái cayábéeri yàcalé mabáyawanéerica, íipidenéeri Jerusalén, iricuéricawa chènuníise Dios yàatanáise. ¹¹Yái yàcaléca mèlumèluíricani Dios icamaláná iyú. Mèlumèluíri càide iyúwa cawènfiri íba cabalèeri íipidenéeri jaspe, cuniéri quéwa iyúwa cayábéeri vidrio. ¹²Yái yàcalé idèniaca itéesewa iwáináwa chènuníirica, manuíri nacái. Yái iwáiná idèniaca doce namanùbaca inùmawa. Macái inùmata abéeri ángel ibàlùaca icùacani. Macái inùmata náipidená ichanàacawa doce namanùbaca yàawiría Israel itaquénáinámica. ¹³Nuicáca máisiba inùma iwáiná ìwali este iwéré, máisiba nacái inùma nàyaca norte iwéré, máisiba nacái inùma nàyaca sur iwéré, máisiba nacái inùma nàyaca oeste iwérecata. ¹⁴Yái yàcalé iwáiná doce namanùbaca íba yáapíisèeyéi náalimáwanama náipidená ichanàacawa níái doce namanùbaca apóstol yèepuníyéicatéwa Cordero yáapicha.

¹⁵Yái ángel itàaníríca núapícha idènìaca oroírí metro yáalimáidacaténá yàcalé, ibàlài nééséeri iwáiná nacái, inùma nacái. ¹⁶Yái yàcaléca abédanaméerita ibàlài icáalaca. Néese ángel yáalimáidaca metro iyúni yái yàcaléca. Dos mil doscientos namanùbaca kilómetros icáalaca, càita nacái icáalaca ichènunica, càita nacái icàcumàa icáalaca. Abédanamata icáalaca yái yàcaléca. ¹⁷Néese ángel yáalimáidaca iwáiná yàcalé itéeséerica. Sesenta y cinco namanùbaca metros ichènunica càide iyúwa èeri minaná yáalimáidáaná wawàsi.

¹⁸Yái iwáináca yáawami cabalèeri íba cawèníiri ípidenéerica jaspe. Yái yàcaléca yáawami orota càide iyúwa masaquèeri vidrio. ¹⁹⁻²⁰Doce namanùbaca manuínaméeyéi íba iwáiná yáapíise. Iba imanùbaca ichanèerica ìwali abéeri íiwitáaná cawèníiri íba: jaspe, cabalèeri íba; zafiro, capíraléeri, cuniéri íba; ágata, capíraléeri erúamàwaca, samànéeri íba; esmeralda, ipuléerisíwa, cuniéri íba; ónice, éewéeri, samànéeri íba; cornalina, quíiréeri, cuniéri íba; crisólito, éewéeri, cuniéri íba; berilo, ipuléeri, cuniéri íba; topacio, éewéeri, cuniéri íba; crisoprasa, éewaca nacáiri, samànéeri íba; jacinto, chubénaméeri, cuniéri íba; amatista, capíralesíwéeri, cuniéri íba; ²¹Níái yàcalé inùmaca doce namanùbaca yáawami perlata, cabalèeri íba cawèníirica. Inùma imanùbaca imàníiri abéeri perla íicha, iwáiná inùmapiná. Yái yàcalé yàasu manuíri carretera yáawami orota, cuniéri vidrio nacáiri.

²²Canácata templo yàcalé írìcu nasutácaalupiná Dios íicha. Yàcalé imanuícata nàaca Dios icàaluíniná, yái cachàiníríca náicha canánama, nàaca Cordero icàaluíniná nacái. ²³Càmíta iwàwacutá èeri icànaca yàcalé ìwali, quéeri nacái, icànacáiná ìwali yái Dios, Cordero nacái nacamalánáca. ²⁴Macái cáli nééséeyéi yèepunícawa yàcalé icamalá írìcu. Wenàiwica íiwacanánái natéca nàasu cawèníiriwa yàcalé írìculé. ²⁵Yàcalé inùmaca canánama canácatáita ibàliawa èeriapi. Canáca catá néré. ²⁶Natéeripiná nàasu cawèníiriwa néré yàcalériculé, níái macái èeri minaná càasuíyéica. ²⁷Quéwa báawéeyéi íiwitáise canácatáita yéewaná nawàlùacawa néré. Cawinácaalí iiméeyéica áiba yáapícha càníirica nanírísíwa, cànííchúaca nacái náinusíwa, nía nacái cachìwéeyéica, canácata yéewanápiná nawàlùacawa néré. Níawamita idènièyéica ípidenáwa ichanàacawa Cordero yàasu cuyàluta írìcu, yái cuyàlutaca idènièrica náipidená canánama níái Dios yèeyéica icáuca càníiri imáalàawa.

22 ¹Néeseté ángel yáasáida nuicáca masaquèeri inanába, yèeri wacáuca càníiri imáalàawa. Asáiri yáaculé manuísíwata

càide iyúwa waicáaná vidrio. Yái inanába imusúacawa Dios yàalubái yèewíise, yái yáawinacatáicawa Cordero yáapicha, nacúacaténá canánama. ²Yái inanába iwatácawa bamuchúamibàa yàcalé yàasu manuíri carretera yèewibàa. Aicu nabàlùacawa carretera idùlepibàa, càita nacái abéemàawáise nabàlùata nacáiwa néenibàa. Yái àicuca, yácata yèerica wacáuca càmiíri imáalàawa. Idèniaca ìyacanáwa, doce yàawíría yàaca ìyacanáwa macái camuíta. Quéeri imanùbacata càyacanácani. Yái àicu ibáináca cayábéeri dabéca ichùnièrica macái èeri mìnaná. ³Yàcalé írìcu, canácatáita ìya wawàsi Dios iiquéerica iyúwa báawéeri. Dios, Cordero yáapicha, ípidenéerica Jesucristo, nacúapiná èeri mìnaná néenibàa. Nàasu wenàiwicanái yàaca nacàaluíniná. ⁴Naicáwa Dios inàni néréwa. Nadèniapiná Dios ípidená napùdàlicuwa. ⁵Canáca néré catéeriwa. Níái iyéeyéipináca néenibàawa càmita iwàwacutá napucúadaca lámpara, càmita nacái iwàwacutá èeri icànaca nàwali. Wáiwacali Diosta icànapiná nàwali. Nacúapiná macáita Dios yáapicha càiripináta, èeri càmiíri imáalàawa.

La venida de Jesucristo está cerca

⁶Néeseté ángel ímaca nulí: “Báisíricata yái tàacáisica, íná yéewa píalimá peebáidacani macái piwàwalicuísewa. Yá nacái Wáiwacali Dios, yái imàaquéerica profetanái icàlidaca tàacáisi inùmalicuíse, idéca ibànùaca yàasu ángelwa yáasáidacaténá yàasu wenàiwicanái írì càinácaalí ichàbáanápínáwa mesúnamáita”, ímaca nulí yái ángelca.

⁷Wáiwacali ímaca walí: “iPéemíacué cayábani, nùanàpiná mesúnamáita! ¡Casímáica nawàwa cawinácaalí yeebáidéeyéica yái tàacáisica Juan itànèerica cuyàluta írìcu, yái icàlidéerica càinácaalí ichàbáanápínáwa!” càì ímaca yái Wáiwacalica.

⁸Núa Juan, núacata yái yéemèerica, iiquéerica nacái macáita yái tàacáisica. Idécanáami nuémíacani, nuicácani nacái yái wawàsica, yá nubàlùacawa nùulù ipùata iyúwa ángel írì nùacaténá icàaluíniná, yái yáasáidéerica nulí yái tàacáisica. ⁹Quéwa ángel ímaca nulí: “Picá pimàni càì. Núacata piacawéeriná íbaidéerica Dios írìpiná píapicha, péenánái yáapicha nacái níái profetaca icàlidéeyéica tàacáisi Dios inùmalicuíse, náapicha nacái níái yeebáidéeyéica tàacáisi pitànèerica cháì cuyàluta írìcu. Piaca abéerita Dios icàaluíniná”, ímaca nulí.

¹⁰Néese ímaca nulí àniwa: “Picá píbàani áibanái íicha yái tàacáisi pitànèerica cháì cuyàluta írìcu, icàlidéerica càinácaalí ichàbáanápínáwa, mawiénicáiná yái èerica”, ímaca. ¹¹Cawinácaalí imàníyéica ibáyawanáwa,

nía nacái casaquèeyéica íiwitáise, iwàwacutá nawènúadaca náiwitáisewa nabáyawaná íchawa caquialéta. Cawinácaalí nacái cayábéeyéica íiwitáise iwàwacutá namànica cayábéeri mamáalàacata, nía nacái masaquèeyéica íiwitáise iwàwacutá nèpunícawa mamáalàacata mabáyawanéeri iyú”, íimaca.

12-13 Wáiwacali íimaca walí: “iPéemíacué cayábani, nùanàapiná mesúnamáita! Yásí nutéca cawèníiri, yá nacái yùuwichàacáisica numàaquéeripiná macáita wenàiwica irí náalimáwanama càide iyúwa imanuícana nadéca namànica cayábéeri, báawéeri áibata. Núacata yái ìyéericaté èeri ipíchawáiseté; núacata nacái yái namáalàidáaná canánama càide iyúwa las letras alfa y omega. Núacata yái idàbéericaté macáita, imáalàidéeripiná nacáiwa macáita”, íimaca.

14 Casímáica cawinácaalí masaquèeyéica imànica íiwitáisewa báawéeri íicha yéewacatená nayáaca nayáacaléwa yái àicu ìyacaná yèerica nacáuca càimíiri imáalàawa, yéewanápiná nacái nawàlùacawa iwáiná inùma irìcubàa wàlisài Jerusalén ìyacàlená irìculé. 15 Déeculé yàcalé íicha nàyaca níara casaquèeyéica íiwitáise, nía nacái camàliquéeyéica, nía nacái iiméeyéica áiba yáapicha cà míichúaca náinusíwa, cà míirica nacái nanìrisíwa, nía nacái inuèyéica wenàiwica meedá, nía nacái yèeyéica ídolo cuwáiná yéenáiwana icàaluíniná, macáita nía nacái casímáiyéica ichìwáidaca áibanái wenàiwica.

16 “Núa, Jesús, nudéca nubànùaca nùasu ángelwa icàlidacatenácué pirí yái tàacáisica, nalípiná macáita yeebáidéeyéica nutàacái, ìwacáidáyaquèeyéicawa yàcalé imanùbaca. Núacata yái rey David itaquérinámica. Núacata nacái idàbéeripiná Dios yàasu èeri máiná cayábéeri càiride iyúwa mèlumèluíri dùlupùta ichanèericawa mèlumèluwaca mapisáisíwata èeri imanùbaca”, íimaca yái Jesúsca.

17 Yái Espíritu Santo, úa nacái Cordero yàacawéetúapiná náimaca Jesús irí: “iAquialé!” càí náimaca Jesús irí. Macáitacué pía yéemièyéica yái tàacáisica, “iAquialé!” càí píimacué Jesús irí. Macáitacué pía nacái iwàwéeyéica icáucawa cà míiri imáalàawa, aquialécué, peedácué piríwani mawèníiri iyú, càide iyúwa macàlèyeyéi iwàwa iwàwáaná ìiraca úni.

18 Yá nùalàacué pía cachàiníiri iyú macáitacué pía yéemièyéica yái tàacáisi Juan itànèerica cháí cuyàluta irìcu, icàlidéerica càinácaalí ichàbáanápináwa. Aibacaalí itùculiada néeni áiba tàacáisi àniwa, Dios yùuwichàidapiná yái wenàiwica yùuwichàacáisi iyú, yái yùuwichàacáisi Juan itànèerica ìwali cháí cuyàluta irìcu. 19 Aibacaalí yúucaca tàacáisi

cuyàluta irìcuíseta yái icàlidéerica càinácaalí ichàbáanápínáwa, càmita Dios imàaca iyáaca iyáacaléwa àicu iyacaná yèeri wacáuca càmfíri imáalàawa, càmita nacái Dios imàaca iyaca mabáyawanéeri yàcalé irìcu, yái àicuca, yái yàcaléca nacái waléeyéica ìwali cháí cuyàlutaca irìcu.

²⁰Yái Wáiwacali Jesús icàlidéerica walíni yái tàacáisica íimaca: “Báisíta, nùanàapíná mesúnamáita”, càì íimaca yái Wáiwacalica.

Néseté núumaca: “Báisíta, amén. ¡Aquialé, Wáiwacali Jesús!” càì núumaca.

²¹Nusutácué Wáiwacali Jesús íicha píripínácué imànínápínácué píri cayábéeri.